

宣
化
縣
新
志

卷十七
藝文志下

宣化縣新志卷十七

藝文志下

記

重修宣鎮廟學說

古 越 王佐

稽鎮學之設始於明宣德之七年用都督譚公請也楊學士記於前矣越弘治辛亥楊撫軍重修之劉學士復記之道德仁義有齋習射有圃宏廣嚴邃蓋所以萃養斯人者蒸蒸日上嗣後兵燹屢起人苦金革其蒼鼠古瓦棟折榱崩之狀有不可勝道者我國家定鼎以來垂四十餘年漸仁摩義於斯矣今上以智聖神武削平禍亂薄海內外盡隸版圖欲垂放牛歸馬之會

宣化縣新志

卷十七 藝文志下

一

化爲敦詩說禮之風但標鑑弗樹望者易淆陶鑄無模趨者易惑也爰令天下廣修學宮凡在臣隣誰不是遺而是承哉然而鎮學之宜急修者固異於昔日而更重於他邦何則宣鎮之在昔日一邊塞已耳此都人士皆耳聽鉦鼓目覩旌旗之不暇今則烽燧不警眠者貼席矣從是而振興之膠庠泮水之間不蔚爲菁莪棫樸之地乎他邦之學關於一郡一邑已耳宣鎮去京師三百餘里北門鎖鑰實基於斯况由茲以出西北數千里其詩書禮樂之化皆從斯以推其風而暨其流是鎮地固爲西北之領袖而鎮學又爲觀瞻之化源也非亟以修之烏乎可於是恭承上意在城汪司馬署街宋守戎等董其事儒學陳廣文諸

生王士傑等鳩其工廟則自先師殿始以及東西兩廡門亭坊壁學則自明倫堂始以及東西兩齋角門大門莫不勤以樸斲加以丹雘焉蓋規之乎舊制罔替煥然可覩矣問始厥事則四月八日也問竣厥功則八月下浣也余適自龍門署篆口北儒學率諸生來請記于余余曰噫何趨事之勤而落成之速也余有以卜斯文蔚起之先兆矣宣鎮各屬在處有學在學宜修然不以窮徼荒塞無力勸修爲辭則以見在繕修尙需時日爲請茲獨循墻以趨則殿廡森然登堂而望則彬雅可掬官斯土而師斯邦者朝斯夕斯而提命焉將見以仁義禮樂訓諸生以孝弟忠信教後進豈特橫經服道者足副觀光之選而築版椽杙

宣化縣新志

卷十七 藝文志下

一一

者亦將盡爲宮樓之奇矣余故曰有以卜斯文蔚起之先兆焉爾至殿廡門亭之數捐修協贊之名具刻諸陰使後之君子得覽而攷焉是爲記

康熙歲次甲子仲秋

重建尊經閣記

喻 鴻

記有之化民成俗必本於學學莫要於通經經載道者也經之外子史百家所以翊聖經而成其尊也郡守之職在於教育人才爲之闡明正學講求經義使不惑於異端此通經爲學者之要亦守土之責也宣化古上谷郡俗尙武藝屯兵設堠蓋重鎮也百餘年來涵濡聖澤士生其間頗知習詩書而敦禮讓余以甲申冬來守是郡深以教化之原勸學爲急飭所屬修文廟建

書院培義學期年以來修舉廢墜西甯赤城龍門蔚州等處學宮書院次第創修其餘亦皆以次修葺郡學明倫堂後舊有尊經閣貯書萬卷明季遭回祿閣遂廢書亦散失前守李將以修文廟餘資八百餘金議欲建復旋調任未果余曰此余任也烏可不葺其事將率僚友捐金爲助擇吉鳩工庀材購石閱數月而閣成今春復加丹雘計費千二百餘金閣七楹臺高八尺堂寬五大樓高計四丈軒牕洞達四面空闊凭欄而望幽冀山川苕蕘聳秀環拱迴繞而閣遂巋然獨尊矣郡中科名歆絕有年是科獲雋五人或以爲閣成之吉然耶否耶余曰是閣之建也豈惟是風水之說爲科第計哉必將爲諸生購書籍窮經稽古

宣化縣新志

卷十七 藝文志下

三

不遺餘力焉經載天地萬物之理修齊治平之道與夫聖賢之言行古今之得失下而至於食貨之源流兵刑之法制莫不畢具賢豪傑士研其理蘊有以激發志氣開拓心胸所爲功名事業之本胥於是乎在異日英賢輩出風俗醇美余固不以閣成而塞乃責也而所以建閣之義始因以不虛諸生勉乎哉

道光七年閏五月

重修廟堂碑記

李象鵬

道光二年冬象鵬來守斯郡張教授樂田劉教諭士魁以修理文廟請時方議整飭書院修葺考棚念是舉工尤鉅三事並行匪惟經費不敷而庀工鳩材弗克躬親懼不足以妥先師之

靈而饜士人之望既而經理書院增益膏火彌補漏卮嚴立條規多方訓迪郡城生童及各州縣來者雲集明年八月修理考棚改置棹凳塗附之工易爲木石以圖數十百年規於是併力壹志爲大修 象 鷗 文廟之議 與觀察德公同三廳官十屬牧令教佐捐廉以倡郡人士聞風興起不勸而輸曾不數月經費已裕又得廉而明者數人董其事凡殿庭之殘缺廊廡之欹斜墻屋之傾圯樑柱之槽朽椽棧磚瓦之破碎悉行改作其中爲大成殿殿旁兩廡殿後爲明倫堂及東西兩齋其前爲戟門其旁名宦鄉賢二祠其外櫺星門其左文昌祠祠後爲五王殿廟門之外有廳爲致祭宿齋所罔不樸斲丹雘制仍其舊物更其

宣化縣新志

卷十七 藝文志下

四

新戟門外有泮池向有水道由都督署後順流東注厥後泮池穿漏水道漸湮軍民亦據爲灌溉之用池遂涸竭 象 鷗 請于都

督仍復舊規以昭潤澤之象廟側有民地五畝半錯於香火地之間爰買之歸諸守廟者工既竣學官率諸生及董事請爲之記謹按明宣德七年譚都督廣始建文廟名曰萬全都司學楊學士士奇記其事至宏治六年嘉靖四十二年萬歷二十七年凡四修葺皆有碑記自是邊烽屢告金革在衽子衿城闕無復嗣音我朝定鼎以來文教覃被越康熙甲子詔天下廣修學宮於是陳廣文及王生士傑等建議重修別駕王君佐爲文以記之迄今又百四十年閱時既多坍塌實甚 象 鷗 守斯土而弗克

事事則何以無疚於志乃以三年十月預爲籌辦四年二月興工至八月而畢共捐銀二千零七十餘兩制錢一千七百三十餘緡除用實盈餘銀六百三十餘兩錢三百五十餘緡象鷓督同學官及董事核算明晰既經有餘因思明倫堂之後舊有尊經閣建自前明藏書萬餘卷後燬於火遺址尙存藉餘資復爲建興購求經史以供披閱而塞上早寒艱於工作會象鷓調任常山未竟其事以俟來者至於捐輸數目董事姓氏另鐫之石用備參稽以爲後人勸

宣化鎮修武成王廟記

張佩綸

罷武學是也將士不學非也罷武成王封是也太公不廟亦非

宣化縣新志

卷十七 藝文志下

五

也禮緣人情而爲之節文今在泮獻囚受成於學之典固不能行而肆師祭表貉爲位推造兵法者神之兵家以太公爲本謀則釋黃帝蚩尤之祀以祀太公其誰曰不宜夫世之稱太公者往往流爲神怪師之尚之父之儒者有述焉於是一切權謀奇計皆託太公爲說而世亦用陰符圖法病太公噫神太公者果足以重太公耶病太公者果足以損太公耶其不知道則一也生民以來道莫大於孔子尊孔子之道者莫嚴於孟子孟子之言曰由文王至於孔子五百有餘歲若太公望散宜生則見而知之若孔子則聞而知之由此以推其爲天下大老則如伯夷其自任以天下之重則如伊尹太公亦庶幾近聖哉必以太公

之道爲異於孔子之道其視儒道亦狹小矣難之者或曰世之所謂六韜羣知其僞矣世之所謂太誓武成亦羣疑其僞矣太公之書不傳則太公之道不顯烏得而推行之顧吾取賈誼司馬遷劉向之所稱述舍其迹而師其意去其駁以得其純然後知太公之道足以爲天下萬世也觀夫敬勝怠者吉怠勝敬者滅義勝欲者從欲勝義者凶四言者盡之矣昔周公作周禮以成一代之太平大司馬之職當以歲時教民爲戰陳其於邦國之數天下之圖罔弗周知一甲一盾一弓一矢皆立專官視之若煩碎而求之則貫通時太公以文武爲大司馬疑章程皆其所參定其後管子以太公之法治齊今舉其書以證周禮一一

宣化縣新志

卷十七 藝文志下

六

與經義合誠得太公之道推行之國以富兵以強內以修外以攘亦敬義者爲之根本也太公之廟自晉汲令始於唐宋之世典禮日崇廟徧天下而教士作軍之法乃蕩然而失其紀武夫暗噫叱咤以爲勇則鄙古兵法不足學儒者高語性命又視士卒服習器用利得地形爲末務至於藩鎮鄰敵盜賊之禍相踵而起則委諸天數之適然而烏知爲人事之不豫哉明罷武學以爲士當文武兼備其言甚美然將帥以積資用而武科之末技取上不知所以爲教下不知所以爲學安能得夫可將可相可農可兵之材而用之蓋自儒與兵別爲二家不得其所折中文武相軋之風弱於人心者且千百年而未之改也於是乎人

材日窳將略日疏而世變且日亟區區一廟之廢興抑末矣宣化自古爲邊郡要害鎮有遼金時舊廟在洪武罷祀中神靈赫然將吏不敢替會採李筌太白陰經說立旂纛廟則舉軍牙六纛內之馮牙並行而祠太公如故國朝因明制以太公從祀歷代帝王而州縣之武成王廟聽吏人葺治康熙間鎮將嘗一修之日益頹圯保靖王君可陞鎮宣化久乃復新其廟使其客石儒珍參考史志折以今之法度西廡配享諸名將及明季所增之淫祀輟不復修而治其旁爲學舍置田儲書俾軍人之子弟來學焉若王君者非所謂不變今之法而得古之實者歟夫吾不敢謂入太公之廟者卽能讀太公之書讀太公之書者卽能

宣化縣新志

卷十七 藝文志下

七

明太公之道然而上谷突騎名天下久矣其俗勁而好武僂見愾聞亦將有以振動其耳目而入其心安知無豪傑之士油然而感挺然而興也余嘉總兵之能明舊祀因略舉大司馬進士之法及所望於此者俾刻石以喻邊人豐潤張佩綸撰文

光緒十四年十一月戊申朔越九日丙辰

萬全都司儒學增設學田碑記

今上卽位之四年歲在甲子郡國當大比士侍御張公當衡文上谷拔其雋應畿內鄉舉公又抗疏陳宣士數溢三韓而解額未定士氣又阻請比三韓士解額五名或三名上下禮臣議竟覆奏如公三名請詔報可蓋明興二百五十餘年上谷文運轉

新由此其始也公又檄宣雲多士試於有司殿最之仍集其課藝備省覽於是宣雲士彬彬興文學矣故事直指使按部有贖緩多充公費公悉發二鎮贖緩並節省諸金令所司置腴地贍貧士之無担石者予因是有感於侍御公造士之遠也古者帝王馭世不分教養二端而養每先教故五教之敷恒後于百穀之播語曰禮義生於富足又曰無恆產而有恆心惟士爲能三代而下士鮮不爲貧濫矣夫以饑渴故喪其生平豈烈士所爲然漸靡使然有不能不隨而波者良可痛惜也嘗考往牒司馬公爲相每詢士大夫私計足否人怪問之公曰儻衣食不足安肯爲朝廷輕去就耶內翰賈公廷試第一往謝杜祁公公獨以

宣化縣新志

卷十七 藝文志下

八

生事有無爲問賈謂公門下士曰黯以鄙文冠天下而謝公公不問獨問生事豈以黯爲不足魁乎公聞之曰凡人無生事雖爲顯官不能無俯仰累今賈君名第一則其學不問可知其爲顯官又不問可知衍獨懼其生事不足以致進退皆爲厚祿居耳范文正公在睢陽掌學有孫秀才者索游上謁文正贈錢一千明年復謁公又贈一千因問何至汲汲道路孫戚然曰老母無養公見孫詞氣甚非乞容因令補學職月給三千供養後十年聞泰山下有孫明復先生以春秋教授道德高邁朝廷召至太學卽昔日索游孫秀才也公歎曰貧界大矣儻因循索米至老雖人才如明復烏自見也夫司馬公諸人豈其以菲薄待士

而惓惓生計開後人求田間舍一經哉正以士之足乎內無待於外者百未能一而士之足乎已無待於人者蓋數數然也待御公立朝忠誠精白類司馬君實其巡行塞上祕略威名震讐諸虜絕似軍中韓范祁公不足道也乃旣焉宣士關百年之風雲而又爲宣士謀百年之燈火其造士之遠在他日正未可量寧止一孫明復月俸三千乎今宣士密邇首善嚮化旣久卽爾司學名卿鉅公素不乏於昭代則孫之儁才賈之高第爾士所自有也獨其自足而無待於人卓立於饑渴無負侍御公造就不佞實惓惓焉是役也主其議者侍御張公而某官某公皆職贊成宜得竝書張公諱鯉號翔溟進士山東人胡公諱士奇進

宣化縣新志

卷十七 藝文志下

九

士南直人田畝計二段一百區價計一百緡原業李繼祖東門外地名三里溝一段東西畛上地八十五畝東至聶安西南至官道北至溝蔣春芳七里村一段南北畛上地一十五畝東至梁國臣西至劉大南至道北至本主四至具詳碑陰是爲記

孝廉魏諱之樞聘妻貞女王氏碑記

宣地土厚俗醇山川間氣所發不鍾于男子卽鍾于女人以故誌書所載代不絕書或有蒙表章而聲施于後世者或有不蒙表章而孤貞泯沒者此亦人之有幸不幸而要其正氛所鍾流行于宇宙而不朽也如我衡王公之女者先許婚于孝廉魏生百兩未御而魏生赴公車沒于京喪返里門其家設靈受弔女

氏聞之啟于父母欲親往弔奠以盡婦禮且曰吾魏婦也請終喪焉二親許之以成其志爰備儀仗設鼓吹若嫁婦者往送之門於時宣之士大夫及傾國之人無不嘖嘖稱羨義而敬之以爲女氏絕男女之願著綱常之節爲人道之大閑足以勵末俗而挽頹風慶且賀之者盈戶外閱數年其舅姑以其寡無所出又繼其侄以子之第魏氏家世儒素益以貞女母子饗殮之費乳哺之貲一時拮据實甚欣逢府憲朱公來蒞茲土聞其事破格表章捐俸以倡先更聞之于道憲江公並募十邑之賢牧有司各捐已資悉付之典家取其息以供貞女之需猶將請於上憲顏閭旌表以爲後來勸

宣化縣新志

卷十七 藝文志下

十

武成王廟集捐署名記

王可陞

同治九年正可陞奉檄來鎮斯土整隊伍練騎兵築營壘造兵房閱沿邊要隘防秦晉回氛逾年復簡勁旅于役庫倫軍事方殷慮城垣坍塌不足衛民遂銳意集捐修之而重新各廟宇及教場則又余首先倡捐乘暇集各營官兵次第爲之也鎮署西武成王廟傾頹太甚工最鉅蓋歷金元明以來爲時獨久已廢成墟舉修匪易故遲遲至今始因我朝康熙間前總鎮閻君可權意依舊修之溯厥初金旁舍極多原爲材官習射舞劍投石超距有所棲止嗣久際承平共樂雍熙武備漸弛正殿前殿暨兩廡舍宇二百年中棟折榱崩木石甃瓦垣墉概毀無存僅餘

名將塑像風雨剝蝕塊然露處人莫攷其爲何神又何解前代立廟講武整軍本意宜乎滿地荆棘任人侵墾竟成菜圃余詳查原委得園戶退地逾半就舊址新之先正殿次前殿東西兩廡悉起廣廈再大門旁門均創建與殿相稱計成三十餘間已畫棟雲連具昭輪奐而隙地當增修者尙欲陸續爲之統計甑瓦木石工匠物料約費逾三千金余與綠練各營官兵同心樂捐而因昔人之意急願修明武備尤屬衆心皆同異日者冀我官兵同袍同澤法古名將餘烈爲國宣勞卽由此同心基之又豈徒習射於斯虛對廟貌不思效禦武實用耶余與衆其共加勉邊兵素本苦寒子弟七八歲逐日撿糞作薪助竈下用無嚮

宣化縣新志

卷十七 藝文志下

十一

學者余甚憫之遂自捐千金置學田地四頃餘每歲租約得百金永作延師修資期在秀良者稍讀詩書知車磷駟鈇親上死長爲忠義不敢云投戈講道俎豆折衝遂懈戎事也另置園地一段歲入宣租錢一百五十二千專給守廟道人常年食用之費且任以司香火淨神舍俾守之勿替後有同志應諒余仍舊貫酌增文學不爲無益旣請豐潤張君佩綸爲太公作廟碑復自叙數言將捐金銜名修造經費用過若干註於碑陰以示將來非敢爲贅語蹈於矜也

光緒十五年

重復泮水記

王鴻

泮池之建也始於宣德七年都督譚公廣廓于萬歷戊戌巡撫

王公象乾皆形成半壁鑿石三楹溝穿北野引清流而長注焉
明倫堂碑載云泮池更鑿注之清流教澤以衍者卽其事也迨
後相沿既久水道填淤遂分撥于道府鎮三署而池塘涸矣夫
興廢無常轉移全資人力至乾隆四十五年邑進士張廷弼起
而興復之更于道光四年邑舉人權大經等請而重興之疊疊
案卷確有可徵之數公者亦欲以澤潤長新者也先人往而時
勢易舉而復廢者兩番是豈謀畫之未善歟抑以章程之未定
焉耳茲幸蒙觀察恒大人恩湛上谷化洽人文覽泮壁而興感
屢矣爰詢其始末訪其源流卽命府縣學齋禮生員劉培楮大
中計全魁姜希聖等堅爲修葺再行長流並咨商友梅蘇太尊

宣化縣新志

卷十七 藝文志下

十二

飭委雅泉汪治廳妥議協辦悉如舊規蒙議於每月從道署撥
水二次府署撥水二次准以月之初五十四八二十七等四
日爲期無或缺乏庶幾前日之修復無常者於此而定爲成案
矣噫有爲之先者必有繼於後斯水之盈而復縮者數次果時
之有未就耶抑行之待其人耶惟我觀察大人以一念振興遂
開百年鴻緒目前之潤澤姑勿遽道而其崇隆文教者不與譚
王二公後先輝映也哉是以謂之繼美前人也可卽謂之振興
文化也亦無不可諸同人感戴弗忘咸願立石以垂永久因樂
其成而爲之記

重修文廟記

宣郡文廟舊名萬全都司學創於明宣德七年逮我朝定鼎以來改置爲宣府前衛學康熙二十三年詔天下郡縣廣修學宮三十二年更爲宣化府學而規制始備自道光四年前守李公象鵬率屬捐修迄今已久漸形傾圯守斯土者責無旁貸因請于觀察國公率三廳十屬暨學官弟子等捐金鳩工葺而新之添種松株於甬路旁是役也經始於丙寅季春告成于戊辰仲夏督興作者屬余爲文以記其事語云當其可之謂時旨哉言乎古者出而用兵受成於學凱而振旅釋奠于學魯頌所謂在泮獻馘是也慨自庚戌辛亥粵逆構釁塗炭生民農荒于畝土廢于庠上賴廟謨宏遠指授方略大江南北以次削平此皆

宣化縣新志

卷十七 藝文志下

十三

聖祖神宗崇儒重道儲材學校文武兼資故能中外戮力將相同心殲厥渠魁驅此羣醜邇者餘孽跳梁擾及畿輔曾不轉瞬摧陷廓清當此

皇上釋奠于學獻功于學之時而宣郡文廟之重修適蒞厥事此豈非當其可之謂時乎今夫戡亂于已往旣藉膠序之栽培而消患于未萌尤須人才之教育况上谷風俗夙稱愿樸投戈講藝說禮敦詩化鴉音于泮林集鳳鳴乎盛世是則守土者之所深幸爰叙顛末敬告來茲

段家堡義學經費碑記

貢生

張文哲

從來世運之隆在乎風化風化之興在乎學校粵稽古昔以迄

於今治隆有由要皆由興養立教而來也然則學校所關顧不重哉獨是盛於聲名文物之區行於通都大邑之地降而遐陬僻壤風亦微矣卽如此處僻處山村向無久館貧寒之家卽有聰明子弟惟不踐迹終難入室有馬君桂林在貿易之中常以爲嘆當光緒元年君年經六十生意稍遂工資頗饒因謹節儉用儲蓄得宣錢百六十緡放於村中取息以爲館師脩金如有不足以諸學生之束脩量力攤辦嗣後君仍以儉用之工資或一年入五六十緡或一年入八九十緡及至十年歲終核算前後共積成本宣錢八百緡統計一年利息已增百有餘緡庶足書館經費自此停止束脩是年君年屆古稀又慮一旦不親其

宣化縣新志

卷十七 藝文志下

十四

事或子孫指爲馬家私學爭論或族黨引入外人攪擾如此何以長久遂親身赴縣具由稟明同官入公立案蒙縣批准詳蒙督憲賞給樂善好施四字匾額一併發給備案又有其侄馬文運恐其久而棄廢以本取息者不過暫濟不給何如製產以致久遠第思以本取息誠經費有餘而製產作租恐脩金不足於是情願將自己地捨入義學五十四畝以繼其志以成其事遂亦稟縣存案行見學校立從學衆甚望後世多出明敏之才何難臻化行俗美之盛也哉又邀同公正紳董六位經理其事並飭輪流公辦不准提取成本挪用亦不准馬姓人等冒行硬辦蓋叔創於前侄助於後如此之德何其盛歟合村感其盛德又

恐久而湮沒故將情由勒石撰文庶好善之誠萬世永傳濟世之志千載不滅後之覽者尙善述焉是爲誌

整飭段家堡羣學碑記

廩生 張 璿

嘗聞不要其始前人之創造不能以永垂不要其終後人之據依亦難以不朽是原始者更不得不要其終也若茲義學以原其始自光緒元年以至十三年業成義租十三石更兼息錢百餘緡其經費所資不已綽綽有餘哉不知事貴可大尤貴可久使徒拘拘與舊章是率成法是循特恐借茲多事畏難者易起煩心取息難齊局安者漸生懶意則世遠年湮不惟有紛繁之慮而且有利廢之虞其欲遺教化於後世也能乎於是紳董會

宣化縣新志

卷十七 藝文志下

十五

議妥立章程將取息錢賑屢屢索收每除經費陸續製產迨及二十六年間錢賑收清悉製恆產統而計之連前施捨共成學田三頃零三畝五分據此以觀不將致可大可久之宏規也哉抑思學田有準定租須輕租或不輕雖製恆產難免凶饑之慮因念及此遂議集地戶人等按地定租或依或減均不過較尋常五六已耳總合學田共成新斗穀租五十石整又俱立租契並飭每年上秋送到過風不准短欠尤戒耕種地畝萬不准私行轉推以禁差錯之弊所謂千年不易萬世永傳者此也夫生財之事亦既有成用財之規更宜有定自茲以後舉凡每歲銀糧延師脩金以及館中日用資費事公相議定俱給以租後

之人量入爲出勿替行之雖不比較庠碩大之望亦可爲小舉
永遠之資矣因憶先人設立之初義學未足向賴學生攤辦束
脩迨其少有遂停止束脩僅攤雜用以迄於今卽雜用等項一
概停止亦未爲不足之計也貧寒子弟不更易於藉得師承哉
第思規則備則備矣警戒嚴則嚴矣儻不銘之於碑則人往風
微恐難歷久不變也爰是重立碑石詳撰後文製田之原由與
立法之情意一一載之於碑庶幾乎先人之事至是可成先人
之志至是可繼此所以必要其終也因將後製地畝坐落何處
四至所界併隨帶銀糧事悉載於碑陰後之覽者有所稽焉

第五師範學校建設記

本科第一級學生公擬
國文教員郭維城修正

宣化縣新志

卷十七 藝文志下

十六

口北地處邊陲山高水激氣勁風寒生其間者獨成風氣勢使
然也夫在遠古邈不可稽惟自元明迄清興學茲地數百年來
漸聞有絃誦之聲此其民不特崇尚武術而文雅之士亦漸出
焉至科舉廢學校興我口北亦未瞠乎其後可知事在人爲不
能爲地限也省立學校設置宣化者向祇有中學一處而投考
學生往往因額滿見遺中途輟業欲投考他學必負笈擔簦奔
走數百里外不獨山川修阻跋涉維艱而地方清苦寒士居多
每因經濟困難欲行不果是以遊學者寥若晨星而各縣小學
常患乏教員之選識者憂之所以有議設師範學校之舉也夫
師範學校胡以第五名也先是直省學區規定五處第一師範

設在天津第二保定第三灤縣第四順德惟此校成立較晚故以第五名之也然則設於宣化者何宣化口北之首縣也居各縣適中之地來學者道里平均較他縣爲便故以宣化爲定點然縣城寥闊地址甚多而必於彌陀寺者抑又何也彌陀寺宣郡之古刹也地基高敞面積寬大形勢之佳罕有其匹祇以代遠年湮無人修理荆棘滿地一片荒涼僅餘佛殿兩層久爲宵小藏身之所爲除盜藪破迷信用舊材構新舍取其建築省而成功速也溯自民國四年春口北各縣勸學所有改劃師範學區之爭實爲此校建設發軔之始持議未決事不果行是年冬經直隸教育會一再請求始有設立此校之成議至五年夏季

宣化縣新志

卷十七 藝文志下

十七

議定出售大馬羣地建築費方有所指六年一月省長朱委任楊君欣蘭爲校長並派籌辦員四人覓定地址開始建築甫經朞月而校舍落成輪焉奐焉以有此今日之現象然亦苦費經營矣校址在城內之東北隅四周築有圍牆居中高大室可容三百人爲全校學生習禮之地額曰禮堂校長楊欣蘭題內懸校訓四字曰忠信敏公教員郭問陶書禮堂之前東西廂房各三間爲圖畫室爲成績品陳列室南則九間爲各職員辦公室中間一過道通外當院築八角石欄池爲養蓮畜魚之所池之旁有小室西爲傳達處東爲應接室再南則大門通街矣禮堂之後連續建正屋三層每層七間除中間一過道外左右各三

間爲講室六處禮堂之西建正室六層每層十間爲學生寢室自習室理化講室五間在寢室六層中間而教員寢室亦在其內爲便於管理也此後飯廳一連六間可容三百人最後爲廚室五間而盥漱室夫役室茶爐廁所皆在西偏統計一百三十七間此皆新築之校舍也禮堂之東有小院一處因絀於經費未遑改作故仍其舊手工教室游藝室教員預備室在焉原有鐘樓一座鐘最大擊之可聞十里外校內用此以司眠起操場亦寬廣在新築校舍之後舍之東南爲校園佳卉葱籠甚饒桃李而葡萄六七叢尤稱特品利用河水引流灌溉誠佳境也全校面積約佔一十四萬四千四百方尺而續購迤西之民舍尙

宣化縣新志

卷十七 藝文志下

十八

不在內以後擴充頗有餘地但願來此學者無徒以箇人之私便而不顧大局尤必以保持清潔愛護公物以盡一己之責任而維全校之名譽庶不負國家出若干之貲財諸君子費浩大之心力深謀遠慮造斯廣廈以培養我輩之苦心也幸甚幸甚

序

宣鎮圖說序

明 劉孔允

周官有古險氏掌九州之圖以周知其山林川澤之阻地之有圖所從來久矣在邊裔尤急夫邊裔我與敵共之者也險易之弗辨要害之弗明彼以飄風驟雨駭所不存雖錮南山猶有隙敢謂畫地之爲金湯也耶宣鎮稱肩背重地舊無圖其附之於

九邊者志略耳而未詳其合之於雲中者詳矣而未辨至南山之擁護陵寢所關綦重亦略而不載他可知己余不佞生於茲地猥以承之領鎮凡山川原隰屯戍亭障溝塗之屬足迹幾半又參之以目證之於口雖無文獻亦足徵矣因爲圖說而付之梓總而爲一列而爲八散而爲六十八以南山諸隘附焉其間地里之廣狹形勢之夷險軍馬之多寡亭燧之疏密諸部之遠近無不具也至敵人出沒之地我軍遏伏之衝特爲拈出若芻餉若租賦若鹽糧撫賞亦隨地以載謂是邊之屬也不然則其以邊制者也方今守在四裔邊塵不聳誠無所事此顧狃不可常備不可弛儻爲未雨綢繆之計則此一圖也曲折咸具德裕

宣化縣新志

卷十七 藝文志下

十九

可籍以籌邊形在目中馬援無煩於聚米或後來君子之所不廢乎無以余不類而并弁髦視之也

塞語序

明 劉應節

塞語者尹氏朔野子所爲書也尹子少習兵事識兵機每欲提一旅橫行塞上毅然負勒燕然封狼居胥之志會世廟中葉天下承平久諱言兵卽武夫世胄爪牙肩臂之師語以韜鈴莫喻皮傅尹子慮之乃述塞語然則塞語其有憂乎夫兵有機將有權因敵制變詭秘莫測是謂兵機醮廟而立扶輿遣之無從中御是謂將權古之名將得機而神得權而運然後從事四裔而功不殆是故謀勝於朝堂者王伊呂是已戰勝於封疆者武衛

霍是已托言於簡編者傳風人策士之流是已余觀尹子所爲塞語審形勢明戰守裁今古之變察彼已之情逆睹禍福倚伏之幾明若觀火矣然而思患周防如虞突薪若將弗掇危詞曲譬如疾痛之呼人惟忍弗聞何爲其皇皇若是夫總文武者將之良也簡能授任明主之務也以尹子才置之帷幄受以專閫卽伊呂宜未多讓其功豈遽出衛霍下乃阨於郡縣困於簿書期會之間竊比風人策士之流托塞人之語懷罪我之懼岌岌焉幸采於觀風者所謂詠歌不足繼以嗟歎是擾心之感也故曰塞語其有憂乎雖然摧鋒陷陣功一劍耳揮枹決策功一時耳藉令尹子樹勳塞上視塞語孰多夫兵猶禪也禪有法眼兵

宣化縣新志

卷十七 藝文志下

二十

有妙機皆未易語是故任三軍之政而不知三軍之事則敗矣不知三軍之事而妄語三軍之機則惑矣卽令尹子樹勳塞上而塞語亦安可以無作於戲知此則尹子行志匡時固自有在何必勒燕然封狼居胥而後可以語尹氏子之功

塞語後序

明 尹 耕

朔野子旣述塞語憮然有問曰余罪矣余罪矣夫不在其位不謀其政余羈伏一榻寓言千里則可乎雖然生不諱之時有羣策之屈聞之於塞居者而言之於不塞居者譬之樵人語山漁子話水陳其所見而已無他腸也是故知彼知己百勝之道也則首述鹵情據險守要敵衆之術也則次述形勢險非人不成

則次述城塞城非人不永則次述乘塞乘塞懼忘戰也則次述出塞出塞慮伍失也則次述抽丁抽丁必於官軍之餘故次述官軍戶有兵必使知方故次述練習然馬不可不蓄也遂及夫保馬內不可不備也遂及夫民堡事變無常禍福倚伏作事圖始必使可循故以審幾終焉千慮一得實抱悃誠知我罪我所不敢辭也

鄉約序

明 尹 耕

鄉者何周制五家爲比五比爲閭四閭爲族五族爲黨五黨爲州五州爲鄉管子內政五家爲軌十軌爲里四里爲連十連爲鄉也後世聚民而居大抵曰鄉以地則有互武以社則有枌榆

宣化縣新志

卷十七 藝文志下

二十一

以俗則有君子以人則有鄭公蓋不必五州十連之廣也約者何周制比有長使之相保閭有胥使之相愛族有師使之相葬黨有正使之相揀州有長使之相調鄉有大夫使之相賓管子內政軌有長五人爲伍里有司五十人爲小戎連有長二百人爲卒鄉有良人二千人爲旅也後世民居相告戒大抵曰約以誦讀則有塾舍以臧否則有月旦以備荒則有義倉以備警則有弓箭社蓋不必相賓爲旅之大也是道也奚以始乎曰與民生始也昔黃帝經土設井一不洩地氣二無廢一家三同風俗四齊巧拙五通貨財六存亡相守七出入相司八嫁娶相媒九有無相貸十疾病相揀是其始也其所從來遠矣奚以終乎曰

與民生終也漢有三老亭長以教民孝弟力田唐有坊村正以檢察不率宋有里正衙前以督辦公役皆其遺也百世以俟而不惑矣今之鄉者何也曰以廬舍之比鱗也形勢之犄角也耕植作息之無相遠也則爲之所謂不必於五州十連之廣也今之約者何也曰以版築之必興也器械之必具也守禦應援之必相資也則爲之所謂不必相資爲旅之大也國制不有鄉乎族有望甲有長里有總其鄉秩然也而今何以復曰鄉曰國制集戶以爲甲合甲以爲里丁中有消長而版編不移死徙有出鄉而隸屬已定籍其常也今則廬舍之比鱗形勢之犄角耕植作息之無相遠通其變也國制不有約乎導俗有誥飭憲有令

宣化縣新志

卷十七 藝文志下

二十一

明刑有律其約炳然也而今何以復曰約曰國制誥以厚民生令以定民志律以禁民非其彝訓也今則版築之必舉器械之必其守禦應援之必相資偏其急也然則國制何不通其變偏其急而爲之乎曰併堡以教守頒器以利用懸賞以旌勇爲之倡矣而不苛苛誅者嚴軍政而寬民力也閭閻將遂通其變偏其急而爲之乎曰溺於所聞安於故俗者凡民也若夫豪傑之士雖無倡之者猶興難與圖始可以與慮終者菑害不切其身者也疾病而臨水火將叫號奔走以求免矣上有所好而下不遺上有所倡而下終事先國家之急而後已私者也是故廬舍比鱗形勢犄角耕植作息無相違而鄉成矣版築必興器械必

具守禦應援必相資而約舉矣鄉成則畎畝皆險約舉則耒耜皆兵塞以嚴外防而堡以嚴中堅兵以戰境上而民以戰清野不俟督責之繁而人自爲力無須教閱之素而俗自知方計無有得於此者昔嚴尤以周人城朔方爲中策秦人城長城爲無策蓋以周知內治秦專外防周使人自守秦役力已甚也今國家塞垣際天設險固矣而復內治必盡民自爲兵視周不上較乎噫此鄉約之所以作也而軍民一體之義著矣兵農相資之用明矣首尾皆應之勢成矣故曰觀於鄉而知王道之易易也

宣府鎮志序

明 孫世芳

古諸侯之國地方百里咸得署置史官用司紀述凡其政教號

宣化縣新志

卷十七 藝文志下

一十三

令上達天子旁通方岳冢君下暨所隣邊裔雄長者舉存之籍故其國史實與天下史可參稽焉是故以杞證夏以宋證殷孔子慨諸文獻而韓宣子聘魯卽謂周禮盡在則以有春秋也曾謂一國之史邈不與天下事耶自封建制廢郡邑守宰不得署置史官其政教號令獨紀述於天子之國之史苟稍有遺佚竟將無所參稽而事係一方可備省戒者遂泯不復傳矣後世守宰賢者間慮及此乃推古侯國置史本意各以其方政教號令志於其書將爲天子之史補所遺佚而傳之至今僅一二見則其時守宰所上最績可概睹也宣鎮故幽朔地軒虞氏已入治區茲以遐遠不述卽如置有郡邑以來凡統於中國天子幾代

專據於方鎮權臣幾傳陷於隣附外裔雄長幾更部族而政教號令隨時變易者惟其守宰得以奉命下行乃未嘗彙萃故實而傳之遠何歟繫攸攘矯虔之故曰嬰其心而莫之暇及也幸賴天子之國之史欲爲內外峻防諸凡疆理經營悉見紀述故雖不假方志參稽補所遺佚而政教宏規號令大旨固已燦然具在可備省戒矣我高皇帝光復軒虞治區憫四百年漸染眈庶徙居庸關南舊郡邑守宰盡罷其戍居兵卒武吏馭之要亦一時權宜已爾太宗乘三駕餘威圖復郡邑而鼎成之亟淵慮未紓向微仁宣二宗命憲臣來監卽政令有所不行又何敢以一方文獻責介胄也憲孝之朝御史中丞崑山葉公盛故城馬

宣化縣新志

卷十七 藝文志下

二十四

公中錫撫監於茲丕烈訐猷亦旣殿我邦土復以其暇攬一方文獻薈萃成編以備省戒然就中而論則方輿僅述法度未詳甲賦僅存經書未及所謂大政教號令且遺佚失哀又將何所取藉備戒世世耶世芳蚤歲嘗讀二公前所爲編時已有概於衷奮欲綴緝顧躑憂灼心孤陋梏量不敢以斯文自詭叨官吏局而後進爲役牽退爲病累無復有舊念也庚申之歲時食於家御史欒君尙約過而謀及則蚤歲所概於衷者又因而勃然興矣於是忘其顛蒙殫其智識搜羅檢索先之往代史書當時制冊次之名臣偉議先儒緒言又次之幽人所憤談譯人所襲講關世道者筆之不病於煩悖時宜者芟之不病於簡然後發

以義例標以要綱著以條章斷以意見而志成焉凡爲考二十有六爲表有七爲傳有九爲卷四十有二以明王制則損益可推以察天時則休咎可驗以別地宜則夷險可尋以阜物利則豐約可酌以揆文教則化之隆汙可原以奮武衛則勢之強弱可究以定人之倫品則其人言行得失可徵是世芳所謂志也云爾已昔陳壽夙擅史長亟爲李延壽稱許今其史止存紀傳志未及爲意蓋慎之江淹所謂史莫志難之說信不誣也世芳幽朔鄙夫焉敢望古人畔岸乃於古人所致慎者冒然爲之妄作之尤極知難免然政教號令議諸天朝頒諸方岳播諸徼外夷裔者亦旣收錄則不惟二中丞昔所未逮得以續成而天下

宣化縣新志

卷十七

藝文志下

二十五

史賴之參稽者或於此乎不棄矣後之君子儻能訂正謬戾採掇精微炳其義於日星嚴其詞於袞鉞庶幾備省戒世世而世芳綴緝初志所托以傳及者益又遠也書院御史王君汝正董君學相繼以監治來遂屬兵憲楊大夫巍刻之蓋亦取世芳之說爲不誣云

續宣府鎮志序

明 胡以溫

昔鄉先生孫太史世芳因葉馬兩中丞舊編而成宣府鎮志上溯黃虞下迄元明薈萃古今考據典核其體有六綱曰昭王制曰察天時曰別地宜曰阜物利曰揆文教曰奮武衛其目有二十六考大都做馬端臨文獻通考而爲之其年表列傳則一以

史漢爲歸識者謂可與李崆峒何大復西安中州兩誌相參今所梓行者是也然其志至明世宗嘉靖辛酉而止迄今上康熙辛亥歲又百有餘載幾同文獻之無徵如甲申乃明末清興一大沿革之會闕而未書非所云昭王制也千有餘里內百數十年之大災祥闕未書非所云察天時也疆域山川雖猶昔也今距京師若干里屬畿內自何年闕未書且塞外久歸版圖則一邱一澤皆我阿我池闕未書非所云別地宜也戶口昔多官軍丁男今概民籍矣田土昔皆屯團今膏腴多非民產矣賦稅昔皆米芻後有憑恃城社割屬改折者矣皆闕未書非所云阜物利也與夫法令之繁簡風俗之媿惡祠祀之興廢學校之增損

宣化縣新志

卷十七 藝文志下

一十六

亦闕未書非所云揆文教也兵制自明神宗萬曆以來已非衛所之舊迨崇禎末又無慮數變迄今屢經裁定按籍而討軍實不啻十去八九蓋因時制宜勢所固然皆闕而未書非所云奮武衛矧穆宗隆慶己巳賴王襄毅力主款市順義王幡然輯兵中外享中葉之福者數十餘稔舊志有征戰一考繫經略後此尤當日經略之巨且善者曷可以闕至若職官選舉之宜哀而表者宦蹟鄉賢忠臣孝子文人節婦之宜立傳者皆在闕略俾閱者第能數往莫從知來每念及此不禁有志未逮之感閱歲癸丑恭遇皇上允輔臣請詔天下修志以備一統之採擇檄行及於茲土時武進徐公元珙分守口北以輿人之言屬草於以

溫辭之不獲且趣甚速懼未克竣厥事爰取檄披覽見有接古
續今之語乃始恍然曰予曩有鎮事續略之集儻有當於萬一
不敢負賢監司之委也乃檢笥中與闔鎮諸官長所徵購桑梓
同志所采訪皆得自碑版鑿鑿可據者慎審於衷載筆而書事
增於前而卷帙半之甫脫稿卽索去聞已達于巡撫中丞臺矣
及閱畿輔通志吾宣事被採入者寥寥焉爾豈獨以邊隅故略
之耶其如屬在畿內何然而志各有體在畿輔固無妨於嚴在
宣鎮則不厭其備雖未敢謬語於該括考據之義亦惟弗失前
賢之志而已此溫所爲補輯與續修之本末也

馬市圖序

清王隲

宣化縣新志

卷十七 藝文志下 二十七

馬市圖一卷蓋故明萬歷時筆也載宣府來遠堡貢市拓中爲
城旁肖紅厓寧靜諸山俯瞰梁欏城中有臺翼然朱衣危坐者
二人青方袍左右侍者十許人青袍坐別幄者四三人環城睥
睨甲楯立者可百人曼胡之纓短後之服弓刀森植意狀閑整
臺下軍吏數曹長跪白事規方墻地百貨坌集車廬馬駝羊旃
毳布繒瓶罌之屬蹋鞠跳丸意錢蒲博之扶畢具其外穹廬千
帳隱隱展展婦女細弱射生投距之倫莫可名數蓋一時之盛
也嗚呼當嘉靖之季北部最强比年深踐宣大間大人則大利
小人則小利士救死扶傷不給戰守益習於是邊郡蒸然稍有
起色迨隆嘉改元俺旦內讐王襄毅因其降息建和戎之勛方

是時新鄭當國中外多言不便者政府獨違衆聽之蕃部亦厭兵就餌歷穆神光熹四朝北邊最號無事雖然當有明諸公但知保疆休士之功多而不知狃安玩敵之弊大但知灌糶銷燧之謀遠而未審坐甲忘戰之患深傳曰善作不必善成非虛言也方襄毅之初建市議曰朝廷若允俺旦封貢諸邊有數年之安可乘時修備設敵背盟吾以數年蓄養之財力事戰守愈於終歲奔命自救不暇者是襄毅亦知款之不可狃而姑爲權宜以紓近憂而就遠計異時枋國之臣苟以燕閒之時申固不拔之計簡軍實飭戎器厲武守常以敵之不至使我有以待其至則封疆之事無弊可也乃觀有明之政一切不然廟廷好以空

宣化縣新志

卷十七 藝文志下

二十八

名讐遠至於斗粟尺帛濡忍而勿能予疆吏則媮爲苟且訓練服習之方怠廢而無所事而一二不諳政體之臣朝夕以減撫賞核市值爲得計使信輕失於遠人以齎寇怒中朝殷算猶倚其富盛日勤遠略援遼戡播禍拏不解軫門庭之憂忘腹心之疾亦幸而撻卜諸人再世不競故勉就戎索耳萬歷四十年懷寧汪公道亨來撫宣時邊事日窳已無可爲者公欲振其積弊稍稍繕葺城堡講宿儲備觀其論闕餉上執政諸書至可哀痛而卒無如盈廷之泄泄也夫宣府天下之雄鎮而神京之近蔽乃數十年間戎政液解士不飽半菽上罔卹而下日離凌夷至於崇禎末造流賊以餓羸創殘之餘躡陽和陟居庸重臣世將

連脰就戮怨軍驕帥搏頰恐後彘之扞強敵而有餘者今則摧弱寇而不足何勇怯殊歟亦積漸之勢然矣來遠堡築於萬歷四十一年圖之成當在其後計爾時市局將變圖猶若誇示大國之威重物力之豐溢者迨熟覩其設色布指將使後之人得其意於毫素之外豈亦殷憂深戒託於諷喻者爲之是未可知也夫一圖之小不足置論余特感於有明疆場之事不惟繫一方利病實則天下後世龜鑑也圖高四尺袤五尺鑿絹寫今存某處年月日叙

濟疾堂

清
王芥園

天地之性人爲貴故凡天之所生地之所長皆所以供人日用

宣化縣新志

卷十七 藝文志下

二十九

飲食之具而三代以上恆見爲有餘三代以下恆見爲不足者非物生之有豐有嗇也均與不均而已矣三代以上二十授田六十歸田十五以下上所長七十以上上所養家有以爲業人有以爲生和氣所蒸疵戾不作故鰥寡孤獨罷癯殘疾者往往而少間或有之則鄉各贍其鄉里各贍其里其顛連無告者鮮有聞焉蓋惟公天下之物力以養天下之人故雖涵濡生息極之數百年之久而戶口彌繁生計不絀者此均之効也秦漢以來地不井授占田各以其私於是富者連阡陌貧者無立錫富者贏而無用或以供聲色狗馬之資貧者積終歲勤動或至於糠粃不厭故富者易驕貧者易諂驕之極遂至於凌人諂之窮

遂流於伎物而傾軋攘奪之風由是而作長民者不揆其本徒恃嚴刑峻罰以止遏其端於是民氣不舒民生愈隘怨憤所積夭扎滋多而鰥寡孤獨罷癯殘疾者恒數倍於三代之世此時雖有仁人在位思生養而安全之極王者之力且有所不給於是上咨而下悼以爲事之所無可如何堯舜猶病者此也嗚呼堯舜之世顛連而無告者顧若是多乎此不均之患也夫不均者勢也居今之世治今之人豈惟井田必不可復雖均田限井亦徒見其擾民而無益於足食至欲生養而安全之則雖以王者之力而有所不給然則鰥寡孤獨罷癯殘疾者將遂聽其轉死於溝中而莫救乎曰何爲其然也居今之世治今之人雖不

宣化縣新志

卷十七 藝文志下

三十

能使貧者盡富然惻獨爲王政所當先廢疾爲人心所共憫循古之道鄉各贍其鄉里各贍其里待養者勢處其分則人不衆籌養者力居其合則事易爲是存乎仁者之倡率而已上谷郡居萬山之中土田瘠薄節氣苦寒在直省中民生最爲艱窘故貧老廢疾之無依者所在多有雍正之壬子有馮之極李珂者惻然憫之思欲設局收養謀諸同人靡不樂從而苦無其地城之北隅大真武廟有西院土房十數間其住持劉陽慧向義願以其屋備用於是各歛貲財創始收養凡入局者若干人越一年馮物故後之司事者賈昌齡高來翔等皆能遵守前規迄於今不廢癸亥冬司事者以乏糧告予惟鰥寡孤獨罷癯殘疾此

氣化之不齊仁政所難遍而我宣人士不惜貲財協成善舉平造物之憾輔王化之窮備顛連無告無轉死溝壑之虞其鄉鄰風俗之美洵非他郡所敢望予雖不敢掠其鄉人之美而坐視經理維艱莫爲贊助怠玩之罪則有所歸爰於講約之日訟於共事諸公暨紳士王公虞郭愷治之來聽講俾各勸捐以資接濟越三日司事者來告曰執事諸公暨鄉之紳士商民聞局之糧莫不踴躍願助蓋爲善最樂人心所同也將書其名與其所捐之數於冊以永仁聲以風來者是宜有序敢請予雖弇鄙不文辭不能已於是舉三代之所以有餘後世之所以有不足者書之以誌升降之感而知我宣人之爲此舉也富者不吝其貲

宣化縣新志

卷十七 藝文志下

三十一

貧者不失其養哀此之多益彼之寡不均之中有均存焉若倣而行之天下鄉各瞻其鄉里各瞻其里雖三代之隆何以遠過尙何升降之足云乎若夫繼而續之推而大之俾有舉不廢修而益虔是存乎後之君子

議論

屯田四議

明 李仙嵐

一衛所轄軍州縣轄民腹皆州縣而錯以衛所邊皆衛所而錯以州縣民之產爲田軍之產爲地每衛五千戶每所一千戶受地各有數而總謂之屯今查宣鎮諸衛所除三州縣外則皆屯地矣其後軍不能耕而招商種商不肯種而招民種於是

團種有地畝有功臣香火驛傳公務有新增餘地諸名各就其時所清理者而名之其實皆屯也屯之名更而屯之額乃失今尋屯額而不抹此名所以畢世無屯足之期矣可考者正統時通鎮屯地四萬六千餘頃徵糧二十五萬有奇至隆慶初通鎮諸名地四萬七千餘頃徵本折二十二萬有奇雖糧視原數多少有差本折有易而地則增而有加矣幅員如故也奈何釋諸名地而求屯求之不得砂磧沮洳不毛窮髮盡可指以爲屯無惑乎募墾之令終築舍也此屯田沿革之大較也一國初建立衛所分軍七爲耕三爲守原以耕濟守也不可耕之地未有建立衛所者獨開平一衛爲上谷最衝今所分爲上北路者轄一

宣化縣新志

卷十七 藝文志下

三十一

十城堡崎嶇于重巖疊嶺之中卽益以雲州所而可耕之地劣於中路以龍門亦衛也而劣於下路豈一衛一所不敵二所哉深究之開平衛原不在獨石自二邊出口歷羊川墩外至舊開平三百餘里盡是平川土膏肥沃乃知最衝之封亦自占絕勝之勢惜乎其棄於塞外也今鎮寧仍存五所之名而糧地非舊制也如獨石馬營多是前監牧馬草場而該衛之地不獨無屯額併無屯可額也溝岔之中掇拾零畦原非屯數而徵糧比於他處不異焉何怪乎招之來而適以靡之去也竊見一鎮折色有六錢一石者有七錢一石者惟道屬皆八錢必當時市價之定評亦此中從來固已貴於他處矣然此中土著無多而土著

之人從來不習耕凡戮力於南畝皆山右之傭秋去春來如北塞之雁所爲斯倉斯箱者亦晉民之魁默土著寄命於其手下時價任其粟死金生然有利則竭蹶而趨無利則掉臂而往宜拋荒之愈多今欲墾荒當先集流募軍尤當先講所以使流頓集而軍應募也不然官受軍屯軍屯之寄不得不督於軍民又將舍己之私爲公從事顧此失彼通融籌算數未嘗增似不可不慮及也一查先年開屯率於順聖川一帶此地原牧馬草場被敵兵蹂躪馬往口南始築城堡耕種然牧場起自永樂而洪武初年亦係衛所屯種之數歲可收糧石四十餘萬足官軍一年支用專設屯田副使經理如葉文莊時亦始屯此地而後

宣化縣新志

卷十七 藝文志下

三十三

及各路補官牛置農器給籽粒皆摘發軍人往爲之耕賣其租以買馬徵其秸以飼牛公務驛傳之外尚有易銀以備公用宏治時尚書李敏奏葉盛各路團種誠爲良規而近年余子俊將給種軍人掣回操守牛具變賣地二起科民旣逋糧馬皆倒斃然則與屯必須團種也明矣團種之必摘發軍人也明矣今所爲團種者非軍也民也卽爲軍乃祖戎之不可脫而其地乃祖遺之不可辭推以予人人不肯受力不能種惟有一逃人逃則地棄後人團而種之名曰新增任地納糧止同地畝乃團種已易爲地畝而額糧未減仍納團種之糧故舊人納糧新人種地甚至此人種無糧之地而彼人納無地之糧冊籍罔稽阡陌莫

辨所以今日爲牛糧地告辨者紛紛而官卒莫之斷也不知團種者官辦牛種而軍耕之所以每畝起科五六七升不等及牛種不給於官則團種之地與地畝地何別而地畝地或納糧一二升或折色一二分團種則五六七升何輕重頓懸若此今查尙書周謙曾題團種原額外量與餘田三十畝仍照余子俊所定每畝三升起科則是無牛種而名爲團種者當在所減也今不惟無減而追出餘田另爲加增愈增愈不知所底止似不可不亟爲釐正也一屯事爲經野大政往多效而近每無功者何也計一佃費銀二十六兩米四石六斗以每頃二十五石言之爲租四十石碾米二十四石若近年價湧還本尙有倍利儻如

宣化縣新志

卷十七 藝文志下

三十四

先年每石八錢六分則將以何物還本此猶曰官嗇而民豐也萬一天時人事不齊而不能必二十四石之人則價雖勝而本無償然猶曰以待來年又萬一本不發而但責耕但取租如向年團種流弊今日安能預禁於後哉此土著之深慮而宜早爲計也且今所爲屯本者曰無碍官銀也撫賞餘利與貨物變價也夫官銀何得無碍以爲無碍則無碍耳至開銷時恐有准有不准若鎮城之駁價在二十年之後則無碍者有碍矣猶曰有案在焉惟有撫賞之銀之貨物既於是日奉制臺之檄動爲屯田卽於是日奉餉司之檄交部庫作軍餉猶曰申明制臺是遵獨慮講款時撫賞亦未可動恐他日問撫賞者不止餉司也初

已奉旨後翻議者寧直一端耶然猶後日事也俱置勿慮而無柰撫賞之銀有欠在軍者民者安能隨取隨至而撫賞之貨物盡朽爛不堪除賞彝人售於何處東作將興銀不湊手何以副上命乎此皆屯政之所宜酌者也

磨笄山辯

明 尹 耕

磨笄之辯諸家不同有謂在保安州東卽鷄鳴山者有謂在飛狐縣東北百五十里有謂在在山東濟南府長清縣者要皆求之於典籍文字之間而不稽之於道里徒步之下是故語意近真而指摘各異考者轉增疑惑莫可較一也夫代爲蔚地其去濟南遼絕甚矣長清之山本名馬頭無可辯也鷄鳴在蔚東北

宣化縣新志

卷十七 藝文志下

三十五

百五十里其去恆山則又倍之豈所謂自上臨下可見之地邪况保安上谷屬地春秋之際在外據之元非代壤而謂夫人者望夫於此自殺於此不亦繆哉考之魏土地記曰磨笄山在代郡東南二十五里一名馬頭山夫代郡廢城在蔚城東今其東南二十餘里所謂馬頭山者人人知之但不知其卽爲磨笄耳而顧他求之可乎又括地志曰磨笄山在飛狐縣東北蔚州去山近舍之不言飛狐去山遠取以爲較遂使考者不循其故不玩其微求之於蔚東北之道里則以鷄鳴爲是求之以馬頭之名稱則以長清爲疑蓋瑣瑣於典籍文字之間而不於道里徒步之下也於戲舍目前之眞狗方外之似天下豈獨一磨笄哉

余於是乎重有感也

箴銘

誥授光祿大夫巡撫貴州都察院右副都御史梅公閻公

墓誌銘

清王熙

按狀公姓閻氏諱興邦字敦仲梅公其號也先世山西太原府忻州人始祖海明初以武略從常開平出居庸關戰柳河有功授宣府前衛指揮使世襲指揮同知遂爲宣化人至六世祖璠由世職仕至寧武總兵璠生一棟一棟生正名仕至遼東義州副總兵正名生師臯累官大同副將是爲公父自師臯以上三代皆以公貴誥贈如公官閻氏世以武功顯至公始勵志於學

宣化縣新志

卷十七 藝文志下

三十六

治舉子業少從舅氏遊江浙間與東南諸名士爲文字之會才名藉甚歲癸卯登賢書謁選得廣西馬平縣知縣旋以艱歸起補直隸之新城新城爲畿南孔道輪蹄絡繹驛馬或不繼輒僉之里民公出私錢買驢數百養之民間役至以應官暇則裨民自牧雇直爲芻收費民咸便之邑有集場多假旗豪爲壟斷公時時策騎行村落中奸究屏迹暮年以才能擢知通州州視新城尤劇甲寅軍興旁午公修橋梁平道路餼糧芻茭無不夙辦戊午陞工部員外郎監收崇文門稅課風清弊絕囊不餘一錢壬戌奉命從今大學士伊公等往視河工至測河身之淺深相地形之高下度決口之緩急目數心識繪而成圖及入告公隨

諸大臣後指畫井井上心異之呼公前問姓名具以對未逾日改授監察御史蓋駸駸乎大用公矣暮年陞鴻臚寺卿扈蹕南巡乙丑光祿卿闕上廷語諸臣曰光祿弊大而費繁非閭某不能辦也乃越次用公公省浮冒嚴濫給平價值歲省大農錢不貲戊辰陞順天府尹會湖廣叛卒夏逢龍構逆上念中州與楚疆接壤思得重臣鎮撫之特用公陞見賜鞍馬星馳之任公至問民疾苦察長吏賢否紀綱肅然而其大指以潔已率屬奉公愛民爲先兩河左右千里戴公若慈母豫省漕糧久行改折會部議仍徵本色公疏爭之凡再上始得請又以歲旱民困疏請緩征豫民大悅秦中游饑詔撥江南湖廣漕米數十萬輸之秦

宣化縣新志

卷十七 藝文志下

三十七

車運驟負晝夜不息公親駐洛陽躬自督率閱三月事始竣已調公撫貴州貴省素僻遠苗彝雜處或爲公難之公曰同屬朝廷疆土何僻遠爲卽日就道旣下車首以禮讓化導其俗而嚴飭各屬勿侵擾諸苗念貴陽地狹民寡則有請併縣治之疏以黔省防兵困苦則有預撥協餉之疏其最著者則請廣鄉試之額其言曰同文敷澤已久遐方人材漸盛黔粵皆同邊服今禮闈旣分中右而鄉試中額多寡有殊乃援粵西額數以請上躋之尋令天下鄉試皆增額有差實公疏啟之也又疏言前總督甘文焜將軍王之鼎皆殉吳逆之難宜建祠於黔上俞其請爲御書扁額以賜蓋所以表揚忠節而風厲殊俗意深遠矣公性

孝友與人交終始如一尤好周人之急自九族以至交遊惠澤無不霑被雅好爲詩得大歷間風味所爲古文詞皆端雅有體所著有冰玉堂集公素康強無疾病戊寅元旦望闕叩賀禮甫畢暈於地臥疾十有五日而卒將革之夕猶口占謝恩遺疏神明蓋終始不亂云公生於天聰九年十二月二十四日寅時卒於康熙三十七年正月十六日丑時春秋六十有四以康熙三十八年五月二十二日葬於宣化府之祖塋銘曰峩峩上谷京師扞蔽地脈蟠聚人材英異惟公之先世濟勳庸桓桓赳赳策名鼎鐘累傳於公始用文顯賢書高擢經綸茂展盤根錯節赤縣神州含香持斧克壯其猷鴻臚清秋禮儀是司句陳嚴肅公

宣化縣新志

卷十七 藝文志下

三十八

實先之爰自膳卿升華京兆綜核保釐詳而有要屹屹中州厥惟重地俾公節鉞撫綏是寄仁心仁政覃於兩河潔已奉公清而不苛移鎮黔西受命而趨深箐重巘勿憚馳驅禮儀漸摩詩書教育文風翔洽苛民悅服黽勉夙夜不敢告勞竟殞厥躬乘箕絳霄帝念忠勤國典用卹豐碑鼎峙籩豆有秩惟公不忘惟德不朽奕奕繩繩永綏厥後嗇施於身篤祐自天泐詞幽宮垂千百年

閱武箴

明

汪道亨

巖巖巨鎮作屏作藩西連朔易東控幽燕崇墉屹屹俯馭羣醜單于克汗靡然奔走豈伊孔懷魯運其衰豈伊畏威文德以來

何天之衢王路四闕消息盈虛曷其有極蜂蠆有毒桃蟲拚飛
緬惟古人敬小慎微邨氏介雞昭公出走處女爭桑兵連吳楚
諭諭訛訛云胡其恃喜怒忽遷踉齧立至養已者順處豹悅媚
馴而擾之勿使我懟昔人有言兵烈如火天生五材闕一不可
睠茲暇日肆爾於田霞卷旌旗霜覆戈鋌步伐止齊鉦鼓嚴肅
器械犀利卒乘輯睦師干之試可以一戰遵養時晦淵然廟算
我來蒞止兼攝內外撫則爾親督則爾帥靖恭職守疇敢弗恪
天鑒在茲帝命欽若惟爾吏士夙夜兢兢防乎其防集木履冰
勿怠勿靡養威以待一翕一張毋俾自壞其翕伊何漢過不先
譏關扼險矯箭控弦其張維何彼或不恭利用執言殲此犬戎

宣化縣新志

卷十七 藝文志下

三十九

盡其在我睨彼順逆伐叛攻心期于馴足我可藉手告成天子
繫爾室家婦子寧止旆旆桑麻優優伏臘寧曰中土鼾睡臥榻
汾陽之忠日月可貫時久泰寧上下俱玩我實殷憂提耳斯揭
盟諸幽獨箴我秉鉞

北門新河銘

并序

明 馮 益

萬全治所環城皆山而城北距山才可五里巖谷重複一遇霖
潦則水泉合發洪波蕩漾宣洩無所直薄城際而西北隅尤甚
城幾不支者屢矣夏秋之交歲括營車以備捍禦已則漫置不
省巡撫使都憲羅公亨信以聞而重以城役猶未遑也皇上改
元正統之十二年鎮朔將軍左都督楊公來鎮茲土諗知其故

爲之惻然乃躬視山川得高下之宜與水之勢則又謀諸右少監趙公琮參將朱公謙紀公廣戶部侍郎劉公璉以聞旣得命遂起北山之麓循西右轉引渠爲河又自西折南經沙河故道以入於洋河凡爲隄岸二千八百六十步有奇隄之左右洄流所趨則籠石爲犍以捍衝激總役工餘十五萬經始於明年之二月成於三月之二十又八日水旣順道而城垣用堅人免墊溺田無汙萊自裨校而下萬口一談咸曰允哉我公之德昔陳堯叟轉運河東築隄防以祛水患人至今名之史可考也况公之功視古無讓一勞永逸實載萬世於是四明馮益旣述其事復系以詞銘曰北山連連其下維水霖潦合發直薄城陟歲滋

宣化縣新志

卷十七 藝文志下

四十

弗治人用靡寧取具臨時莫適爲經都憲有言役未遑只公來歎咨曰我攸理迺陟迺降相彼陂陀自東徂西引渠爲河烝烝役夫其歸如雨畚鍤雲屯鼙鼓弗止伊昔轉運捍爲河隄光昭史書人今名之矧公之德振古無擬功族一時惠流百世我作歌詩匪激匪譽尙俾後來爲公之思

溫泉銘

明 葉 盛

彼靈者泉可濯可沿惟泉之燠可沐可浴也有振斯衣有彈斯冠乃清纓乃濁足也維泉之香可釀可湘維泉之浩亦可禱也足我豪飲時我雨暘泉之靈兮具其好也泉兮泉兮靈爾者神兮樂爾者人兮維人之身兮日新又新兮不愧爾神兮以全夫

矢兮

文啓

徵建柳川書院啓

清 張志奇

竊惟一道同風躬逢禮樂三千之盛揆文奮武地處畿甸五百之中比戶可封人皆爲善有美未學器或弗完唯斯道之有津梁居高而倡俾吾徒之守矩矱觀善謂摩沉逢聖代之作人更屬文林之厚幸堂開鹿洞遍郡國以授生徒室築鵝湖延師儒以造士子蓮池駐蹕龍旂映逢掖以生華金翰飛文螭紐拱貞珉而壯采第賜金賜額畿南之學舍彌宏而美奐美輪塞北之講堂未備輿稽上谷夙號雄都涿鹿阪泉神聖所宅飛狐元朔

宣化縣新志

卷十七 藝文志下

四十一

英傑挺生桑乾發派於天池勢吞鰲極燕然聯峰於恒嶽形踞龍蟠子翼子鸞列雲臺而臥丹壑文卿文盛光繡斧而重名藩馬宗之父子捐驅精忠貫日黃氏之祖孫殉國大節凌霜澡雪忠貞標青霞之品概寒松理學景環極之剛方凡此經文緯武之賢數難更僕是知成德達材之教學必有師不佞幸守是邦傾心斯土十年燈火敢忘舊日之辛勤萬里風雲頗與諸生爲砥礪擬於郡城建立書院廣廈之卜揅築功多授餐之謀膏薪用廣須資衆腋爰集良裘自各屬以及衆紳藉鳩材而資庀器萃十一城之髦俊藏焉修焉息焉游焉續千百載之薪傳中也正也仁也義也濂溪洛水遠紹先型徽國象山近傳宗旨迴廊

列舍無殊槐棘規模點墨研朱寧負丹黃評隲育驪黃於上廐
用期他日騰驤植杞梓於鄧林竚備清時樑棟遊乎學海探驪
而得珠樹彼詞壇處囊而脫穎翔鸞鶴於紫塞噉出高岡長桃
李於春蹊香生空谷斯北方之學未能或先而東魯之傳於斯
爲盛尙於政暇以考媿修儻得經明更通吏事風浴在童冠講
座散十分之春弦誦擴郊坵邊城昌三輔之化矣

柳川書院勸學啟

清 張志奇

鴻文垂範尊典則以流傳俚諺登書尙輜軒而採納矧學校綱
維習俗惟詩書振勵風聲烏公仗鉞開藩首拔尤而羅處士何
武行鑣按部勤折節而訪諸生占茅茹以彙征養木鷄而備德

宣化縣新志

卷十七 藝文志下

四十二

茲宣郡者邊陲要地上谷名區黃水迴漩渺矣金龍聚滙紫山
峯嶽壯哉恆嶽綿延自古以來帝王發跡由今而遡文采風流
况我國家恩隆化洽之時正聖天子綱俊翹英之會本府一官
側席三載分符念父母斯民志敦勵俗知薪樵多士願切育才
惟是道無津梁難收功於藥石學有規矩斯銳志於觀摩溯彼
畿南之學舍久新芳規可企覩茲塞北之講堂未備責任奚辭
雖使者倡始於前旣提綱而挈領亦諸君從公於後俾集腋以
成裘乃庀材未及朞年而大工業已告竣美輪美奐共瞻棟宇
之巍峩肯櫂肯塗咸嘉文昌之佳麗爰諮名宿以廣作人法座
展清輝絳帳之春風常滿臯比振木鐸杏壇之化雨方沾鹿洞

規條不讓前徽於遠代驚湖宗旨何難再見於今時豈無作賦
十年似張平子之誇博學亦有明經早歲若任長孫之號聖童
第濟濟羣英或散處於州邑而遙遙修路恐致阻於山川是以
檄長吏爲代聚文星緘試題而翹徵翰墨日集瑤篇式睨才華
於八斗晴揮珥筆迅掃頃刻於千軍照乘其肯惠乎他山當少
助矣本府縱勞案牘雅意文章月旦謬加品題爐錘敢言造化
收燕市之駿駟騁駉拔鄧林之材榘楠杞梓從此撫桃依李
觀風旣聳於登車佇看講易陳詩肄業均安其坐席矣

朱姚二公祀田詳文

清黃可潤

爲興修先烈祠宇已竣祀田新立乞秩典禮定章程以垂永久

宣化縣新志

卷十七 藝文志下

四十三

事職竊見有明故巡撫宣府都察院右僉都御史謚忠毅朱公
諱之馮志匡社稷身死封疆當眇賊之猖狂與逆闖而共事獨
當一面隱然身作長城振旅九邊卓乎衆推碩果勵兵守禦殺
賊示威奈何逆帥叛閹望風送款勢窮力竭拜疏損軀引決城
樓惟云去一步卽非死所具膺公服蚤屬留此衣以殮吾身譙
鼓秋風迄今猶聞鬼哭北門冷月靜夜如見魂來此一鎮之中
普天之下所以感憤當時而興思異代也同時殉節者郡人姚
君名時中守正懷清勵修嚮義知監鎮之有異謀稔中丞之必
死事常懷憤激屢用悲嗟城破肅衣冠從容自經於學宮祿未
及身死尤難事宣鎮士民痛忠烈之致命感聖世之褒忠於郡

城東南隅立祠以奉之蓋朱公有睢陽之志而無南許之同心
姚君無寧武之權而直追刀鏃之勁烈死以報國祀於其土禮
也遺祠不治祭產無聞墻宇傾頽俎豆就湮職庀材擇匠次第
修砌今土木已竣堂階井然既肅廟貌之瞻宜立秩祀之產謹
以募民郝姓墾東泥河道旁荒地二頃一頃歸縣義學一頃歸
祠每歲租二十一石五斗五升以爲春秋兩祭及朔望香火之
資典禮攸關於始章程宜垂於後理合另摺具詳存案以垂永
久伏乞照詳施行

詩

雞鳴曲

明 劉 秩

宣化縣新志

卷十七 藝文志下

四十四

馬初嘶雞初鳴夜待旦晝兼程昨日晚出長安城今日早望橋
山行東西相去四百里明日山北還晨征不緣薄宦苦相縈何
得如此勞吾生君不見路無窮人易老離家不如在家好吾家
萬里在江南回首天涯歸不早

上谷

金 劉 迎

摩笄聳然來隰水洶而去山川俯城郭藩翰重畿輔桑麻數百
里烟火幾萬戶長橋龍偃蹇飛閣鳳騰翥傳聞山西地出入此
其路源源百貨積井井三壤賦蒲萄秋倒架芍藥春滿樹盤躡
多布韋嬋娟半娥素永懷小靖節厚德皆忠恕至今受一廛如
昔歌五袴傷心隔生死知已今有數歸日當驅車生芻奠其墓

鷓兒嶺

明 楊 溥

前車告脫輻後車屢却行幸爾出險途烝徒發懽聲爲語推車
人戒慎宜有恆不見平陸上覆轍方縱橫出門寂無聲回首歌
載道不歷跋涉難誰知在家好渴僕飲濁流饑馬齧枯草翹首
望征鴻高飛白雲表

雞鳴山行

元 郝 經

一峯奇秀高挿空萬馬踏碎青芙蓉桑乾黑浪落絕壁霜淨天
澄更覺雄窮邊絕徼誰會顧千古行人少詩句渾如定武看嘉
山絕勝齊州華不注

十八盤嶺

元 周伯琦

宣化縣新志

卷十七 藝文志下

四十五

車坊尚平地近嶺晝生寒拔地數千丈凌空十八盤飛泉鳴亂
石危磴護重關俯視人寰隘眞疑長羽翰

桑乾晚渡

明 蘇 祐

杳杳桑乾水悠悠滄海流濬源開馬邑分委下蘆溝常湧關山
月初沉鼓角秋巡行凡幾度今亦望并州

雞鳴驛

清 馮雲驤

不盡蒼茫路遙看落日黃乳羊遮古墓饑鳥啄殘楊大漠風雲
慘狐城雨雪荒昔年爭戰地野老說沙場

宣府作

清 釋一靈

往日多遊幸雲州作帝家離宮臨雁塞御氣繞龍沙青接明妃

草香傳蕭后花羽林軍散後淒切任吹笳遼后多遺跡人憐避
暑宮塞花明寶靨邊月滿雕弓二水桑乾合三雲大漠通花園
經上下歌管慰飄蓬

同友桑乾春望

清 李良年

春郊聯騎好且莫唱陽關雪覆桑乾水雲橫大翻山漸看堤柳
發時有塞鴻還後夜相思處烟沙指顧間

宣化黃令修城之後以除積沙爲功城西緣壕植柳層疊
數萬株風枝所蔽沙不得入因立萬柳亭引柳川之水相
澄映爲勝蹟余以戊寅初秋至宣樹皆成陰臨觀可樂題
十六韻以表斯亭

清 方觀承

宣化縣新志

卷十七 藝文志下

四十六

嚴城當朔漠曠隴合風沙舊失苞桑固誰將戍堠加

前政以沙擁城堠增

置戍防

爬疏功在野保障事如家雉堞排初聳龍堆剗竟窾一槐

徒鄭重

城有槐龍古蹟

萬柳正周遮颺起墉飛隼煙濃樹帶鴉楯添

叢翠列帚拂亂雲譁更繞隄重疊全通水直斜眞宜亭傑立遂
使坐幽遐昔走狐兼兔今聞蟬共蛙初秋無敗葉暇景到高牙
緬彼輶軒整欣茲草木華西風塵不起北闕路非賒古衛川名
柳興朝縣是花人情問桃李

兼種桃李多株

我意重桑麻欲譜龔黃

美休將一事誇

雞鳴道中

明 楊士奇

北斗初高月未斜五更風露淨塵沙道邊叢繞爐香立多是耆

人候翠華

山望雞鳴勢入雲下循仄徑棘紛紛不辭涉險觀遺碣重是歐陽太史文

關外殘春似早春僧房猶見菊花新時平兩扈巡邊塞宣鎮回鑾只二旬

雞鳴途中感興

明楊溥

策馬登崇岡一覽洞八荒山川限南北華彝有定疆猗與商周盛以德爲保障秦隋勤遠略禍亂起蕭牆昔年鑄寶劍自許干將同登山可刺虎入水可屠龍朝來方一試縮手避前鋒撫劍三歎息百鍊無全功圍獵北山麓聯騎營門東北去有坦途東

宣化縣新志

卷十七 藝文志下 四十七

行多荆榛乃逐東行人迂途良苦辛世事恆類此感歎徒勞神

雞鳴晴嵐

明僉憲晏璧

保安東鎮號雞鳴靄靄晴嵐擁翠屏地接磨笄分曙色峯蘄蒼筍插秋冥蚊龍迸出煙光紫麋鹿羣行霧氣清山後八軍歌永樂將軍威武振山靈

雞鳴曉月

明熊偉

一聲雞唱月東生塞上重山久擅名瀲灩曙光回碧落空濛嵐氣帶孤城晴川南下平如掌洋水西來急似絝欲待朝陽穿蠟履閑凭絕頂望瑤京

斷雲嶺

熊偉

誰道雲無愛物心臥依沙嶺下遙岑極知雲去初收雨還爲年
荒偏作霖觸起自能呈瑞彩飛歸應恐結禎雲莫隨浮靄遮紅
日不見長安思不禁

黃羊山

孫世芳

空濛山色對孤城那有黃羊浪得名但取蒸雲蘇萬物無須叱
石驗初平

東郊尋友踏春青遙望山巔雨細零牧子荷簑來訊夢爲占旗
旒蓋驂停

年來山下舞商羊每過田疇祇自傷荆石可移山頂上情人爲
我且鞭揚

宣化縣新志

卷十七 藝文志下

四十八

五卯占雲向碧空春農忻得雨濛濛常將政理孚元宰不羨當
年晉曠聰

洋河臘日洗馬

熊 偉

十萬疆場汗血駒金羈絡腦浴寒漪敲冰尙憶交河夜蹴浪眞
疑渥水湄百戰腥塵齊蕩滌五花雲錦盡淋漓千金駿骨無人
識惟許晴郊苜蓿知

響水舖

楊士奇

屯堡人家住不多屯邊屈曲是洋河褰裳濡足不計數河上行
人愁奈何

鍬底湯

孫世芳

神斧何年琢山根暖噴泉派疑炎帝淪溜訝火龍穿煜煜波涵
旭蒸蒸氣霧煙翻流如乳滑洩濺似珠圓身垢頻宜滌疴沉幾
賴捐紅塵千慮湛白晝一心禪皎潔華沉月澄清碧蘸天歸來
強臥榻魂夢遶潺湲

眺遠臺和東圃劉中丞

熊 偉

眼底秦城限北荒樓臺鼎建爲周防臺高睥睨礙星斗樓迥炎
蒸生雪霜仗鉞兩年風颯颯岢烽萬里草茫茫自今多暇延賓
從覽勝籌邊共激昂

漢疆臺閣蔚崔巍登眺令人逸興飛梯迥難將筋力强景多翻
恨賞心違九天麗日憑闌近三伏炎飈入座微幾見令公開壯

宣化縣新志

卷十七 藝文志下

四十九

蹟不勝吟望思依依

層臺傑閣起山凹地占邱陵人望高保障正須千載固經營何
憚一時勞羣彝竄伏間刁斗上相登臨駐節旄老在江湖驚壯
氣欲拚筋力縱詩豪
老來非是厭登臺臺上愁將望眼開白骨戰場堪墮淚黃花時
節忍啣盃烽烟蒼莽諸爨近草木蕭條萬壑哀更若浮雲揮不
去東南何處望蓬萊

前題

李宗樞

瑤臺曠漢倚丹暉繡斧遙登歷翠微百道晴流浮野塞千巖宿
靄上春衣雲間宮樹天猶隔花外邊塵晝不飛更羨令公開壯

蹟朔方長此具瞻依

前題

戴時宗

百尺高樓雄塞北登臨萬里思寥寥威誇夷夏榮開創勢瞰山河影動搖何地請纓慚弱冠殊方仗鉞憶班超峯頭日暮催歸興遙見丹霞上紫霄

前題

戴金

凭欄百尺凝虛目四際平原景廓寥勅使只今符上將星占何用問招搖三軍閱實無輕舉五爵懸名待異超好是北門眞鎖鑰手扶日轂上層霄

萬家煙火動晴暉鎮朔樓臺近紫微最喜轅門稀露布快瞻風

宣化縣新志

卷十七 藝文志下

五十

陞坐垂衣隊開比伍翔雲陣勢健搏空鷲鳥飛浪笑棘門兒戲輩等閑號令更誰依

前題

毛鵬

八月邊城禾黍收登臺遙望思悠悠河流曲瀉蒼羸島山勢還依鐘鼓樓塞北羽書頻送急關南人馬併防秋千年鎖鑰今猶在緩帶時尋黃石籌

宣府城樓夜坐

明龍門
所參將

岳可

吹角邊城片月明夜深酒罷坐談兵星河倒映清池邑刁斗平傳古堞聲瀚海未標銅柱勣風塵空老玉關情於今塞上多烽火碌碌無緣效請纓

宣府忠義祠拜姚全我先生主

曹天錫

凜凜英魂鑒在茲青衫依舊采芹時能興士節無如子得共祠
裡更許誰數字春秋終古恨一縵風雨畢生怡衡茅翻有文丞
相當日煤山知不知

鷄鳴道中

明總督

方逢時

雞鳴山邑鬱嵯峨山下河流湧雪波奔走十年成皓首山靈應
解笑廉頗

仲秋廿一日試宣士幕中懷延劉延政以詩來政倚几和
之

明巡撫

梁雲構

秋風邊塞颺輕寒誰道霜生鐵豸闌枋鸞盈前捺柱史尊鱸何

宣化縣新志

卷十七 藝文志下

五十一

處憶張翰丹鉛筆上春知盡溲渤籠中貯自寬鳴鏑已東約送
款羽書旋作試文看

秋深徼外偃妖虹匣裏清霜劍影雄蟲篆此中搜剩技鷺車何
處定行踪揀金夙貯雙南價相馬能無冀北空以爾晚成應大
器一番埏埴敢居功

校士上谷

明巡按

秦廷奏

霜寒秋老碧天空桃李春陰綻菊叢冀野無勞問牝牡穀中早
喜得英雄龍沙塵靜千門日鯤海中垂萬里風我自傳經揚聖
化時人莫漫避桓驄

試題凡三小學
居一遵功令也

星文舄奕瑞光孚五色紛披恣較讐內外兩簾懸北斗江河一

柱障東流起衰自昔經綸事持斧肯同汗漫遊願與斯文留大雅
槩鉛莫浪說瀛洲

演武場與孫治齊大將軍觀射

明巡撫 薛三才

林光山色散郊坰射圃秋開入眼青慣是中雕稱絕技果然驚
雁墜修翎旄頭久暗荒沙月箕尾常懸漢將星怪道戟門多整
暇君家兵法有傳經

鴻飛遵渚意冥冥畫角清笳隱客星繞郭水明橫帶玉捲簾山
迥坐開屏盡穿楊葉眸堪豁試拂團花血尚腥留取燕然一片
石當磨楯鼻爲君銘

巡察至上谷書院

清刑部尚書 魏象樞

宣化縣新志

卷十七 藝文志下

五十二

當年文戰此闡中桃李栽培荷兩公
巡按御史梁雲構秦廷奏 驚質敢言空
冀北鳳鳴竊幸附河東再瞻題句心增感回想師門道不窮五
十餘年承簡命重來故里一觀風

宣府略書所見

曹心簡

地據中原盡天垂大漠荒雲多終日白草不待秋黃任水稀魚
蟹衝途但馬羊自憐年四十今始歷茲方

其二

驅車纔入郭突兀兀俗風新比屋粧筒瓦
相傳塞北風勁之故 中元餉麵人
七月十五日以麵
蒸爲人形相餽 事因前代舊業自近時貧莫漫愁彫瘵生全

在大臣

登北山堂

明中翰

張名世

盤空梯石不辭艱，擗翠分煙任引扳。
一望綠陰開遠堞，四圍靄落平山雲。
中西逼鯨鯢穴，日下東臨虎豹關。
勝算全歸樽俎內，幾回時事老蒼顏。

環溪園雅集次岳孝廉韻

張名世

春渠水漲碧波深，遙縱扁舟向夕陰。
明月娟娟調雅韻，溪雲拂拂濕幽襟。
清尊欲覓中山味，綠綺常儲太古心。
濯足滄浪人去遠，菰蘆魚鳥笑狂吟。

夏日躬履各村堡查雨捕蝗

邑令 陳坦

邊邑謬膺撫字疎，星留鴻澤每愁予。
阪田堯岫憐荒野，山徑奔

宣化縣新志

卷十七 藝文志下

五十三

馳念比閭畀火幸，邀蝗去境課耕還。
祝雨成渠幾回中，夜難酣枕惟冀三農化日舒。

乙酉九日恭迎聖駕扈從兩日夜幸邀霽顏爰賦小詩二

首恭紀

陳坦

百里巖疆輦路清，小臣何幸奉霓旌。
天顏咫尺看雲日，龍表端倪識聖明。
禁旅夜深嚴玉漏，翠華曉發指神京。
善從扈蹕千官裏，瞻拜頻邀霽色榮。

鑾輅迎風拂面塵，兢兢清道凜微臣。
洋河水繞旌旗耀，藥嶺時和草木春。
駐蹕花園連玉帳，構橋虹影見勞薪。
欣看龍馭從容去，遙望依依戴主仁。

是夜督修一橋達旦始竣云

春日季試文武生童因賦一律

陳坦

兩載塵襟媿不文，偶來餘暇試羣芬。
戰酣應似戈停日，揮就須如紙落雲。
尺玉田間終有識，奇珍席上豈徒勤。
春風上谷蘭生畹，簇簇江花蔚早曛。

八蜡廟迎候有感

陳坦

自笑蹉跎備一官，辛勤豈但說三難。
僧房直作郵亭看，民牧翻如候吏觀。
呼馬竟誰堪倒屣，折腰無那且憑欄。
季鷹舊有蓴鱸興，何事生涯日轉丸。

洋河橋

時已傾圮數丈

林盛

廣惠橋聞久披風，一往觀長虹。懸日午列缺，斷雲端遠水融新。

宣化縣新志

卷十七 藝文志下

五十四

漾平沙漲舊看輿，梁成有待大息倚闌干。

平湖石

在柳河側旁有
甯東澤書四字

陳坦

北山迤北涓流清，片石欹嵌兩字明。
沙磧竟誰傳盛烈，邊疆猶自震威名。
雙峰肆屺如迴塹，一水潺湲爲洗兵。
晴日徘徊風蕩漾，東潭遺筆不勝情。

柳河懷古

陳坦

明祚方開肇造基，元勳櫛沐憶當時。
可憐馬革如晞易，不及麟圖值數奇。
孳牧有羣都徙掠，旃裘何處尙撐支。
將軍已暝忠魂目，此地誰尋墮淚碑。

四百餘年山後地，廊清何遽忍騎箕。
柳河不斷泉聲咽，沙嶺難

開霧影垂參政三千連虎賁皇高尺一感驢兒於今塞草空含
綠陵谷淒淒入望悲

春日文廟西廡觀姚全我死難遺碑

陳坦

狂飈初斂跡春氣吐晴旭坐久發興新振衣出芸局僕夫導城
東先師謁芳躅展拜俯宮墻流覽懷洞屬俄下西廡堦豐碑遺
蘚綠拂拭眊眼看煌煌義士錄義士繫維何姚生縊殿曲不忍
儒巾污不受公麼辱乾坤留正氣一死信道篤遺詩凡八語字
字砭末俗至今一畝宮幽魂光玉燭六籍信無慙青松挺秀沃
又有申生旺見父投井促哀號觸柱死芳名登鬼錄附載姚生
碣允垂忠孝鵠吁嗟明祚終訂漬遭荼毒小醜燄微熏竟焚崑

宣化縣新志

卷十七 藝文志下

五十五

岡玉顧乃片時撲祇留陽精壩增取宇宙輝兼爲流品勗畢竟
先師澤興起後賢續不見朱勉齊學充義勇足嗤彼監鎮奸犬
彘負軍督惟餘吾道馨景仰重薰浴

眺遠臺

林盛

候望臺高北郭雄登臨送目杳長空鎮城一幅楸秤近譜式曾
經幾局工

草場廢址

林盛

頽垣斷巷草場東犁雨鋤雲廢畝中邊警已銷芻牧散防秋空
憶馬嘶風

俎豆名宦所以章往風來宣府在舊誌者六人焉止後遂

闕然鮮舉微論甲申以前卽我朝隆興以來未嘗乏人與凡應興應革事宜從前有司皆未採訪於萬一非關文獻之無徵也如前任直省總督勲愍朱公鐵嶺李公巡撫于清端公格文清公皆節鉞中大賢其令德善政波及於吾圉者匪淺渺也茲奉巡撫中丞臺檄行嘗所統制一體崇祀厥典甚盛凡我有官君子無不樂爲贊勸置主割牲饋奠唯謹皆事之可書者也謹續載鎮誌矢音如左

胡以溫

畿輔節度古扶風職任視昔較更隆神臯望郡屬有八宣塞千里亦在中若乃督府控更遠大河以南太行東當年總制誰卓

宣化縣新志

卷十七 藝文志下

五十六

絕勲愍朱公最忠烈體國憂民不顧私一疏萬言都是血豈知竟至觸危機身可殺兮氣不折燕市堪飛六月霜皇上親政始昭雪李公英英出帝鄉前此持節多聲望執法如山莫敢撼時雖年少性直方淄川巨欸一力剪昭灼宦蹟此尤芳清端撫泣由特拜誓除害馬拯凋瘵成周保釐召康公往代南畿海忠介後果江表藉澄清流風不與公俱邁猶憶辛酉來賑饑衣簷食糲車敝帷窮鄉鄙屋勤慰問垢黷時對涕漣沔自公去後繼者誰謚同河津文清師厥施未竟遂已矣民到於今總繫思思之不已請崇祀抱牘連章接踵至當事核實傳檄行修墜舉廢意良是行政原欲達下情億兆心中好惡明連帥職在宣上德興

起教化此其則事關立懦與廉頑特書宣乘非等閒

御書萬世師表已昭懸於闕里廟廷仍允禮臣議頒行天
下學宮摹勒匾額一如闕里式宣鎮九學屬在畿內而附
郭前衛學宮瞻仰獨先恭紀四十韻

胡以溫

尼山縣教澤昭如日星垂幽遐咸受範斯文永在茲乘輿南巡
日闕里經幸時崇儒修曠典牢祀展殊儀停鑾留御蓋異數絕
等威迺更灑宸翰榜曰萬世師曾歷稽往代匪不極褒詞文宣
類常謚王爵殊非宜於皇惟聖制兼總義無遺寥寥二千載表
彰固有期偉哉臣僚請廣布四方知爰始自太學遂及於邊陲
茲地亦畿內欽瞻得弗遲遙從勾畫下運墨仰多姿間架與結

宣化縣新志

卷十七 藝文志下

五十七

構布置兩備之鍾繇及羲獻毫端供臨池世南公權輩肘後聽
指麾文皇唐名蹟望之應奔馳宋仁善飛白未免覺有疵幾無
可舉似請況以鼎彝商周之法物供御時追隨古器款識篆帝
楷沙畫錐榜成日維吉駢觀塞路逵仗隊肅前道佳氣靄朝曦
戟門皆洞啟輕塵遍履綦松柏森如迓風濤靜其枝匠氏丁丁
處聲響動鱗鬚物感尚若此於人復奚疑拜稽崇臺下盈盈溢
兩壻中和極懋建厥猷洵克綏武功已莫競文治益加釐凌晨
開閭闔當書捲眾愚優入聖域奧盡抉百家籀誠乃山天授靡
復經人思天章時煥發睿藻每淋漓思將書譜續翻嫌寶晉癡
更聞古檜賦岱宗普照碑是皆同時事莫由申管窺况乃歸典

籍收掌浩無涯聊將簷曝意擬上早麓詩

宣俗以四月一日傾城遊於北山笙歌鼎沸良可樂也予是日候撫軍閱城坐北門良久不至趣駕往觀適遇富平

劉鱗伯與共眺馬

楚黃 沈宜大

忙中偷得折腰工暫領流雲肆碧瞳不自意遭遊冶會如相期有壑邱公綠垂萬戶沉煙裏翠約千峯入檻中我愛此山逢此日融融猶見故園風
生平不厭爲遊忙又際晴巒正艷妝是處輕謳潮細管千峯秀色遶迴廊烟霞到我須如電塵土驅人髻易霜半刻僧房無限好隨風又下北山堂

宣化縣新志

卷十七 藝文志下

五十八

乙酉季夏予以三院之薦乃被彈劾杜門請斥長日無事

遊北山用續前韻

青蠅假我看山工夢覺邯鄲續舊瞳逼面巉岩存骨相點堂雲影笑王公棠陰暫芟捐塵外鶴唳多情入定中最是含沙不到處柴桑一枕庶人風
這回差不爲遊忙躑躅山頭狎野妝賸有清風陪靜坐絕無媚草點迴廊天涯覆手千巖雨世事於今六月霜一望白雲何處是傷心重步北山堂

宣府八景

燕然疊翠

河東

邵嗣堯

如帶山腰石徑通
削成峭壁出鴻濛
承恩發粟盈三萬
無敢磨崖自紀功

雞鳴春曉

絕塞參天一柱奇
東南城闕恰相宜
峯頭日出應先見
莫是司州起舞時

北山高寺

慢嶺樓臺次第高
羣峯如畫落周遭
山房夜半西風起
疑捲寒江百丈濤

洋河冬泮

塞北先寒春到遲
軍城十萬說前時
洋河臘月冰盈尺
一道中

宣化縣新志

卷十七 藝文志下

五十九

開飲馬池

萬柳盈街

萬戶千家弱柳垂
迎風著雨弄青絲
枯中合抱干霄立
知是經霜百歲枝

響泉夏畦

城外城中接小泉
爭將一脈灌桑田
雕牆髣髴公侯第
寥落輕黃麥浪前

黑峯殘雪

雪容山色兩斑爛
野鳥重來失故山
北望長城萬餘里
寒林落照有無間

箭嶺晴煙

鎮城今見曉煙稠
山色氤氳入畫樓
一帶平岡三百里
眞成天險護神州

燕然疊翠詩

步熊中丞原韻

王天鑑

東南鼙鼓罷江干
獨臥孤峯萬仞寒
地擁金湯蟠虎踞
天開煙霧出螺鬟
邊風浩渺飛沙暮
嶺樹蒼涼帶月看
車騎將軍今在否
燕然千載尙嶮岮

前題

胡以溫

合追周雅作斯千
出塞三千事已寒
那有石踪留漢碣
長疑雲黛擁山鬟
嵐深萬仞餘孤冷
人隔層城不厭看
安用臨風懷謝

宣化縣新志

卷十七 藝文志下

六十

眺此中亦自有青岬

前題

陸濬睿

蚩尤稽顙格虞干
此日燕然烽火寒
晴雪吹花殘石髮
雨嵐空翠滿煙鬟
岩銷戰氣征鴻度
樹帶邊聲立馬看
弗閉玉關閑戍卒
何須摹碣勒嶮岮

前題

高聯捷

巍巍翠岫列長干
仰屬清光氣欲寒
宿霧漸消山露骨
披蘿錯翳曉垂鬟
煙飛綠樹崖初合
風逐歸鴻天半看
憑弔那堪詢往事
空餘碧水瀉嶮岮

前題

姚永煦

燕然翠色映河干一望平流澗水寒石壁接天凌漢氣蒼嵐如帶雜雲鬢山開鳥道憑人上碑有龍文勒馬看莫謂征西成故事留將片石在巘岼

前題

王之佐

當年車馬蕩河干今日仍留劍氣寒石磴連崖遮日影翠屏著雨亂雲鬢遙瞻草色千秋冷獨弔荒碑萬古看誰道燕然稱上將空教遺賦寄巘岼

前題

張洪鐘

南山劈立鎮河干夏日陰崖風雨寒遠聳秀峰侵碧漢近呈翠色臥雲鬢脈來恆嶽氣衡斗形勝宣疆景艷看莫道金城成鐵

宣化縣新志

卷十七 藝文志下

六十一

鑄全憑玉塞列重岼

前題

陸濬睿

岼堯翠巘近城干影入洋河碧水寒鹿野月明空石穴玉關秋色點螺鬢屏收寒雨千層出壁破天光萬仞看隆碣當年銘盛世功名何處問巘岼

前題

陸濬華

石壁蒼茫似鑊千秋風颯颯水聲寒漫思絕塞三千里疑對巫峰十二鬢鳥道長從雲外過龍堆好在雪中看漢家勳業猶堪溯爲訪遺碑到碧岼

前題

陸世栻

龍盤形勢起長干雲樹蕭森紫塞寒萬壑奔泉流夜月千峯插
漢動煙鬟須教可汗聞風遁莫使英雄帶淚看勒石朔方成往
事書生空自對巘岼

宣府賑饑

河東 邵嗣堯

萬歲同聲聲挾雷邊城倉庫一時開天顏咫尺臣民見眞箇雨
金雨粟來

長至後五日雨雪祈晴

聞言子半見天心比日天心不可禁早是饑民寒切骨何當白
雪到山岑

雪中喜霽

宣化縣新志

卷十七 藝文志下

六十二

陰消旭日上城闌臘月陽和類小春一飽休忘經歲饑天將雪
竟覺斯民

游蓮池寺和項犀水韻

宣府 同知 吳盛藻

一官牢落竟三年不信城南寺有蓮柳帶拂雲青欲滴萍衣蓋
水碧於煙若添舟是秦淮上那記身居絕塞前勝地最宜人寂
寞嘉游莫謂老夫傳

洋河橋

吳盛藻

何以最愁余長橋人影疎應憐公莫渡豈歎食無魚岸柳青燐
外邊沙白骨餘遊人徒悵望雙鯉不傳書

環溪園感廢

處士 張喬年

知魚亭下魚何在先月軒中月自圓春燕不知人已去年年猶繞舊堂前

北山堂

張喬年

惟愛高山寺偷閒一杖藜亭開燕樹渺簾捲戍樓低既醉忘顛倒狂吟任品題最憐深柳外猶有亂鶯啼

贈清苑令邵子昆父母

張喬年

十月霜飛驛路寒雙鳧忽下萬人歡京畿久播神君譽邊塞欣同召伯看破格推恩周土類從權普賑急民餐每思借寇援饑溺又恐長才屈彈丸

丙子嘉平西郊迎駕恭紀

張喬年

宣化縣新志

卷十七 藝文志下

六十三

自甘老牖下何幸識天顏溫諭冬如夏歡呼人似山博施皆格外染翰每行間聖澤深無極惟慙仰報艱

苦雪歌

張喬年

小春十日見三白屋上堆來過一尺片片冰花撲面飛寒風如整復如磔莫謂來年主歲豐可憐目下邊民窮鶉衣百結薪如桂十室之邑九室空可恠黨尉情性別烹羊煮酒云賞雪獸爐暖閣倚紅粧由今思之眞作孽人言風韻數陶家我道寒酸喬作衙一生碌碌無他事喫得盧仝幾椀茶更笑腐儒孟浩然何事尋梅在雪天假饒凍死驢背上較比蘇卿孰值錢若論三公我非偶既無花兮又無酒閒烘筆硯寫愁歌此中大意人知否

君不見古人有言實可觀天下人安共我安起視當今民牧者
肥馬輕裘良足歎

光緒庚子秋拳匪初平鑾輿西狩李少軒太守奉詔赴行
在候旨公性剛直怨家多往恐不利因告脩墓歸臨行書

此留作多士之紀念題曰留別

并叙知府

李肇南

夫書勳紀績韓昌黎撰平淮西之碑弔古傷今庾子山有哀江
南之賦詩人去蜀淒涼吟杜工部之篇壯士入秦慷慨擊高漸
離之筑莫不夸鳧藻寫鸞箋在當時爲詠歌傳後世爲聲響而
况玉關生入銀綬新辭嘉賓則計失依劉多士則情深借寇離
亭雨雪弄羌笛之梅花宦海風雲幻名珠于薏苡聽烏聲而歸

宣化縣新志

卷十七 藝文志下

六十四

已切數花片而詠將離人孰無情誰能遣此夫豈若君苗焚筆
緘口無言宏景挂冠掉頭竟去也哉時則紅羊劫換青犢妖連
黃巾之反賊重興赤幘之亂民競起犬羊共觸爭隨豎子稱兵
鷓蚌相持終使漁人得利津門旣陷天塹無憑火珠耀而橈槍
明禁鼓搥而刁斗應風聲鶴唳驚傳草木之兵月色烏嘯望斷
平安之火倉皇報警去守謀難幸中國有聖人賴深宮之堯母
謂國君死社稷專指諸侯而寰海共車書始稱天子蓋一人能
撫中外斯六合共托帡幪是有地即可建都以普天無非率土
星原拱北水任流東義炳麟經事垂馬史故因賊氛而入蜀遂
綿二十傳唐室之基避狄難以遷岐默衍八百載周家之祚殷

憂啟聖願君臣共切同仇我武維揚將宇宙何難定亂徽音既
播大義斯明漫籌北伐之師爰下西巡之詔於是張弓矢列旌
旗雙鳳扶輿六龍駕輦翠蓋與槐榆相映鸞鈴偕簫管齊鳴既
出居庸旋臨上谷令傳駐蹕詔下捐租遂瞻雲就日之忱卜化
日光天之治既而威行汾水聲振瀛洲乾馬行天旅墜拓地雙
環捧日待破敵之將軍一柱擎天仗救時之宰相寅清圖治辰
告宣猷敬天披白澤之圖法祖繼蒼姬之運行見史書大定頌
上中興萬里民歸七旬苗格金甌永固還來萬國梯航玉輦重
回再定五洲棋局矣僕六年太守一介書生是香案下蠅虱臣
爲太史公牛馬走才殊杜牧雅好談兵學異王通久思獻策邊

宣化縣新志

卷十七 藝文志下

六十五

城黍守龍門雁塞之間故里關懷梧月葭霜之際每依北斗低
徊丹鳳城中送別西郊躑躅黃羊山下猶記暮雲春樹夢李白
而懷人際茲潭水桃花感汪倫之送我情以深而愈結舌猶在
而難捫爰賦短章藉舒長嘯嗟嗟雁鴻滿澤望撫恤於他時驪
駒在門感別離於此日惠而好我清酬秋士之吟云乎不歸已
醒春婆之夢惟冀情天補恨長留鴻雪因緣縱教劫火成灰聊
記燕雲逸事

留別十首

六年兩度守宣城辜負宣民望治情聖廟新營崇正教

宣郡無
府文廟

予籌款買地新建去秋落成共用銀二萬二千餘兩本年學憲
按臨稱謂甲於直省

學田初設勵諸生宣郡無實興去年春予奉委會辦口外荒地稟准留地五千零六十畝招佃收租作合屬實興費捐廉繳壓荒銀一千零一十餘兩

寇君何用殷勲借七月二十八日奉命隨扈太原起程後宣民赴行在遞留呈始有由懷安折回之命
屈子翻成汗漫行未了閭閻多少事西風回首憾難平

其二

纔說津門戰未休俄聞鞞鼓震皇州提師趙括驚風鶴破陣田
單仗火牛銅鳥有聲傳鷺垓紙鳶無信報龍樓西巡駐蹕沙陀
郡壯志深慚願未酬

其三

書生已老忽從戎鞍馬奔馳兩月中勁卒有誰懸幟赤亂民無

宣化縣新志

卷十七 藝文志下

六十六

復裏巾紅本年宣郡城內有義和團八壇迄奉聖駕將臨諭之仍不解散並敢齊集各團同來府署予帶馬勇三十名捕擊出城共繳刀茅器械數百件大小旂四捆

松楸久別心常戀前月中旬稟請開缺回川修墓蒲柳先彫病又攻本年感患幸已痊好誰是玉堂金殿客挂冠歸隱一衰翁

其四

國恩家訓兩難忘民瘼縈懷祝降康纔說麻徵來白鷺府文廟落成後
適有白鷺來巢廟樹者甚衆人以爲祥無端浩劫起紅羊虎狼紛擾屯關內鴻雁
哀鳴滿澤旁城鎮鄉堡概爲步隱患未清饑未賑一回籌畫一

回腸

其五

少小生成膽氣粗，遭逢世亂費踟蹰。羊公對客頻誇鶴，予蒙潘

保定聞每見屬僚屢蒙稱贊張翰思家酷憶鱸，滿地稻粱剛大熟。本年幸故

園松菊未全蕪，七星山下歸耕後。予藉雲南因隨任在川原藉

寄殯叙州府慶符縣境內問有魚書寄我無。

其六

談兵空學杜司勳，渤海何時靖海氛。淝水金戈誰定亂，崑岡玉

石竟同焚。也曾拄笏吟邊月，安得揮刀破陣雲。翻恨欲歸歸未

早此行，應愧北山文。

其七

猶記當時走馬來，新陰桃李滿城開。觀風屢入文翁舍，閱武重

宣化縣新志

卷十七 藝文志下 六十七

登郭隗台，挾藻攜華。經世選穿楊，貫札濟川材。他年帝室為樑

棟，都是劉郎手自栽。

其八

舞巷歌衢頌至尊，邊民幸有古風存。星垂禹甸燈光燦，七月二

駐蹕郡城夜間城守營何君來云城內居民皆閉戶門前無點

燈者非太守傳令不克遵從予當諭鄉保少焉往查街道每戶

點燃四五盞通宵達旦如遊不夜城中風捲堯天彩影繁，初聞報特予出示云恭

行宮及王公大臣公寓已敬謹分別預備不用民房至供應所

需俱由公款提用概不派民間惟有關至行宮著每戶各

街小巷皆懸黃彩一幅有度至二丈餘者民心愛戴莫不樂從

尤為難得好雨溟濛滋畎畝，本年好雨知祥雲糾縵護城垣

初九日七月二十三郡城民心愛戴天心佑，愧我無功報國

兩見五色雲已為駐蹕之兆

恩

其九

漢家飛將重橫行
殺賊何時自募兵
未得從龍臨古塞
猶思飲馬入長城
桑榆縱遏凌雲志
葵藿常懷捧日情
廊廟江湖心兩繫
往來還欲請長纓

其十

匆匆警蹕報時巡
召見行宮問小臣
駐蹕宣郡時二十七八日
均蒙召見二十九日奉命
查站並尖
宿處所
克敵謀成勞廟算
捐租詔下頌皇仁
奉旨蹕路所經
之處蠲免本年
錢糧
賈生奏事慚前席
李晟勤王愧後塵
禱祝金甌重
奠定普天同作太平人

宣化縣新志

卷十七 藝文志下

六十八

響水舖

在縣城東三十里

邑人

錢福森

河水滔滔去砵匄
石有聲亂山奔絕塞
寒日沒孤城
涿鹿秋雲合
鷄鳴古驛橫
崎嶇疑蜀道
世路總難平

渡桑乾

前人

落日桑乾渡
秋風順聖川
河流奔浩淼
山勢走蜿蜒
迢遞雲中路
蒼茫塞上天
那知陵谷變
耕鑿自年年

鳳凰山

在縣城南一百三十里

此地何年集鳳凰
山形依舊枕高岡
河流滋水如襟帶
地控蘿川足稻梁
烟雨東來連涿鹿
峯巒北去走黃羊
登臨却值重陽後
野菊花開鬢插霜

柳河川 在縣城西

前人

十萬 常開平王人稱爲常十萬 雄兵撻虜庭燕然曾記戰功銘如何絕塞班
師日翻使中途隕將星叱咤祇餘流水碧週圍猶見遠山青開
平勛業今何在萬柳依依送客亭

深井道中

前人

長安十上久無緣往事低徊倍黯然河渡桑乾寒映月地經深
井曉凝烟風塵路迴空回首烽火臺荒不記年極目汪洋千頃
水曾無一滴到農田

地近胡天五月寒披裘尙自怯衣單曙星未沒兩三點古道已
過十八盤碧水四圍新兩漲荒城半圯曉烟殘一犁叱犢田家

宣化縣新志

卷十七 藝文志下

六十九

樂笑我崎嶇行路難

田雄墓

前人

荒塚纍纍土一邱前朝猶自說田侯浮雲富貴空遺臭逝水功
名不洗羞南渡河人裹馬革北來幾輩爛羊頭可憐末路悲黃
闖碧血青燐恨未休

